

樊榭山房全集

冊四

PL
2718
.I14
v.4

7

續集卷二

詩

賦

書

表

乙未年十二月

丁未年

人各性類生十官七年癸丑正

乙未年十二月丁未年

乙未年十二月丁未年

乙未年十二月丁未年

乙未年十二月丁未年

乙未年十二月丁未年

乙未年十二月丁未年

乙未年十二月丁未年

乙未年十二月丁未年

樊榭山房續集卷第二

錢唐

厲

鶚

太鴻

詩乙

悼亡姬十二首

并序

以下壬戌

姬人朱氏烏程人姿性明秀生十有七年矣雍正
乙卯予薄游吳興竹溪沈徵士幼牧爲予作緣以
中秋之夕舟迎於碧浪湖口同載而歸予取淨名
居士女字之曰月上姬人鍼管之外喜近筆硯影
搨書格略有楷法從予授唐人絕句二百餘首背
誦皆上口頗識其意每當幽憂無俚命姬人緩聲
循諷未嘗不如吹竹彈絲之悅耳也余素善病姬
人事予甚謹辛酉初秋忽嬰危疾爲庸醫所誤沈
繇半載至壬戌正月三日泊然而化年僅二十有

四竟無子悲逝者之不作傷老境之無悰爰寫長
謠以攄幽恨

無端風信到梅邊誰道蛾眉不復全雙槳來時人
似玉一奩空去月如烟第三自比青溪妹最小相
逢白石仙十二碧闌重倚徧那堪腸斷數華年

門外鷗波色染藍舊家曾記住城南客游落托思
尋藕生小纏絲學養蠶失母可憐心耿耿背人初
見髮鬢鬢而今好事成彈指猶賸蓮花插戴簪

悵悵無言臥小窗又經春雪撲寒釭定情顧兔秋
三五破夢天雞淚一雙重問楊枝非昔伴漫歌桃
葉不成腔妄緣了卻俱如幻居士前身合姓龐

東風重哭秀英君寂寞空房響不聞梵夾呼名翻
滿字新詩和恨寫迴文虛將後夜籠鴛被留得前

春族蝶裙猶是踏青湖畔路殯宮芳草對斜曛

入姬

權厝西
湖之南

病來倚枕坐秋宵聽徹江城漏點遙薄命已知因
藥誤殘妝不惜帶愁描悶憑盲女彈詞話危托尼
姘祝夢妖幾度氣絲先訣別淚痕兼雨灑芭蕉
一場短夢七年過往事分明觸緒多搦管自稱詩
弟子散花相伴病維摩半屏涼影頽低髻幽徑春
風曳薄羅今日書堂覓行跡不禁雙鬢爲伊皤

零落遺香委暗塵更參繡佛懺前因永安錢小空
宜子續命絲長不繫人再世韋郎嗟已老重尋杜
牧奈何春故家姊妹應腸斷齊向洲前泣白蘋
郎主年年耐薄游片帆望盡海西頭將歸預想迎
門笑欲別俄成滿鏡愁消渴頻頻供茗椀怕寒重

與理熏篝春來憔悴看如此一臥楓根尙憶不
何限傷心付阿灰人間天上兩難猜形非通替無
由覩淚少方諸寄不來嫩萼忽聞拚猛雨春酥忍
說化黃埃重三下九嬉游處無復蟾鉤印碧苔

除夕家筵已暗驚春醪誰分不同傾銜悲忍死留
三日愛潔耽香了一生難忘年華柑尙剖瞥過石
火藥空擎祇餘陸展星星髮費盡愁霜染得成

歿之前一夕索予
擘溫柑尙食其半

約略流光事事同去年天氣落梅風思乘荻港扁
舟返肯信妝樓一夕空吳語似來窗眼裏楚魂無
定雨聲中此生只有蘭衾夢其奈春寒夢不通
舊隱南湖淥水旁穩雙棲處轉思量收燈門巷忼
微雨汲井簾櫳泥早涼故扇也應塵漠漠遺鈿何

在月蒼蒼當時見慣驚鴻影纔隔重泉便渺茫
小園杏花一株去年頗盛今春月上亡後
葉發而絕無一花因用舊韻志感

乍晴時節舊房櫳尋徧交枝曲逕中燕識簾空全
不語花知人去故藏紅香銷夢斷真憐汝酒冷燈
昏故惱公爲怕易開還易落休將怪事怨東風

清明日過朱姬湖上權厝

怕近城南路扁舟又暫停落花知別恨荒草酹幽
靈往蹟六如偈纏哀百悔經瑤情兼玉色爲待拾
遺銘

陳子昂館陶郭公姬薛氏墓志銘云姬人幼
有玉色發于穠華聞羸臺有孔雀鳳凰之事

瑤情
悅之

二哀詩

汪青渠

文酒極流連論交三十年毀家因任俠失意託嬋娟
竟傍要離冢難歸范蠡船隻雞何日奠春樹隔
吳烟

余葭白

淮海無雙士風流見未曾詩中語盤硬醉後興飛
騰雪屋貧留客秋房晚類僧聞歸襄漢艇老病失
心朋

雨夜舊房二首

夜半殘春雨空樓遠響哀因成合衣寢夢索寓錢
來惑溺通人誚淒涼宿世該去年當此夕正把訴
離杯

猶似昔離居夜雨空帷處淅淅不同聽沈沈隔何
許柔鄉謝慧男退相驚天女茹恨待平明殘膏出

飢鼠

午節貧甚歿甫冒雨以白金十兩假我賦
此奉謝

風蒲烟篠翳茅堂著屐誰知水部郎三日雨來愁
不絕一流銀外義偏長授經力養分華黍裹飯深
情過子桑重比木瓜何以報但將輕薄笑人忙

題姜學在畫松爲鮑西岡運判作

萊陽姜仲子矯矯清節後獨持桑海身畫松只畫
瘦矮紙氣屈蟠疎影漏岳竇勿矜干霄意乃爲般
爾宥題字不滿幅筆勢若篆籀對之神魄驚慘澹
見寒秀裝堂沒骨花遠笑荃熙陋

題西岡小簇園圖十二首

在長興縣署

坐樾軒

密林古城隅退食風蕭瑟美蔭願有同崇情甯自逸

兼山磴

登山聞古言徐行則不困山上復有山拾級取諸良

博山臺

林端出延檻四面皆雲山遙見夕陽逕茶人顧渚還

鑿坏洞

通明肖月窟只在垣一方清時非嘉遯吏隱何相羊

俊逸亭

秀微詩品惜奇矯詩評許君家亭子楣只署杜陵

語鍾嶸云鮑明遠才秀入微故取淹當代裁陶孫云鮑明遠如飢鷹獨出奇矯無前

前度軒

閱人非傳舍觀我得安居依舊桃花笑春風未肯疎

劉郎泊

軒標前度號泊用劉郎名酸水如有意重來淥更生

宛宛上

人語落空波游鯨自環繞彷彿石魚湖歷歷坐洲島

萍牀舟名

小有江湖樂舟居如屋裏偃臥看萍星箇箇生九子

停橈館

吹笛出菰蒲延緣思小住水北望花南自有留人處

梯槎

浮槎半臥水春至葉青青倒浸明河影蹤橫犯柳星

木偶峯

水沈旖旎山十步懷芬馥試參枯木禪臭味亦自足

曉行裏湖作

湖中妙清夏拂曉破林霏十里露荷影四山涼翠圍籃輿度空輦白袷透風微過盡西村路初陽射釣磯

過集慶寺弔閻妃冢

香門零落水松牌一種承恩事已乖猶勝鸞綃燕
地去蓮花國裏葬金釵

靈隱寺訪巨濤禪師次沈丈樗崖韻二首

不爽西山約雙旆此竭來高林行障日陰洞坐侵
苔地似蜂歌接禪參鷺子回千年翠微裏又涌幾
樓臺

漫學談天客同尋出世人茶瓜除熱惱水石見清
真憶舊翻如夢哦詩捷若神肩隨伐薪後可許悟
身因

尋呼猿洞

荒塗轉風榛奇勢出重甌秋漲礧善崩石剝去年
蘚梧竹散涼陰不憚雙足繭何處問山公洞深草

誰翦

新菴

小院竹聲合僧雛進茗時壁間鑪子挂閑覓故人

詩

泉脈通牀下竹聲清夜分子友馬四佩吟宿新菴句也

借秋閣

檻俯峯前堆藍曳烟山靈事古竹密秋先一坐傾

晷重游判年旁行寫葉聖畫開蓮

閣中有貝葉經一函明慈聖太

后賜九蓮觀音像一軸

松靄山房

垂蘿絕壁明晝燈我來亭午無炎蒸上方佛面如

滿月平地松影疑層冰八分門榜百金直

松靄二字扁朱

竹垞太史八分書

六時茶板諸天稱白公有語卽吾語他

生願作此山僧

初秋有感

一室呼童淨掃除流塵深鎖半年餘履綦聲已銷
閑砌粉指痕猶印故書命似涼蟬偏易斷情如暮
雨肯教疎驚心振觸傷心候正是茗姬秋病初

次前韻

閑情悲思總難除已是行年半百餘花上露傷黃
子句石閒字感結之書風簾舊愛通頭爽月地今
疑入夢疎腸斷曲闌行立處道妝不見厭襦初
子思哭愛妾宜哥詩恩同花上露留得不多時見
能改齋漫錄白香山詩太湖石上鐫三字十五年
前陳結之結之香山妾桃葉字也香

食鰯魚

一尺銀鰯美東河亦水鄉躍時過暑雨肥處近秋
光收得西施網調成介象薑吳船通酒市風味付

廚娘

題姚敬直西塞山居圖

吳興多勝游謙之未排纘

山謙之有吳興記

城西西塞山

地僻趣蕭散失笑經鉏翁標舉迷町疇

倪文節公經鉏堂雜

志以菱湖一帶遠山爲西塞誤

羨君好家居青竹扉可款漁灣占

風月小住有佳伴

宋錢叔謙別墅在湖州西門外地名張釣魚灣卽張志和釣游

處水亭三間名漁灣月見韋居安梅磳詩話

雙明遙睇外一碧春水緩

參伍峯尖圓影出葭莢短至今白鷺飛桃花忽遮

斷喆兄蓮莊圖我昔題句滿平遠與此同妙處欲

兩袒元真淩波去事往年莫纂適意貴當前興發

不容嬾雲山韶濩音非君和者罕會須共扁舟任

世怪疎誕

答姚玉裁庚申秋日入黃鶴山見懷

十里秋松瀉暗泉參差游事又三年著書未遂名山志纔說幽栖一悵然

原作

姚世鈺

游記曾披畫不如筍輿香篆路迂徐與君同有幽栖志黃鶴山中好著書

秋曉入西山訪沈丈樗崖於靈隱同游冷泉亭觀水兼呈巨公

秋山雨後風淒淒山雲開合無端倪橫衝橋下亂泉發筍輿徑度尋幽蹊宣城老人腰腳健約我茶器相提攜此時巖樹交冷碧帝青寶網窺天低一亭靜觀水石怒聲聞證果醒塵迷倒流卷雪那可畫起誦三峽坡公題山僧小疾示止觀樓鞵不下安禪棲陰沈雨意又復作欲別未別愁霑泥安得

仙人縮地術移取潺湲置我西牆西

和吳敦復題重得先人舊藏宋刻丁卯集後

今人號知書事簡效頗速揣摩盈尺編姓氏春官
錄翩然扛天門高步嘲宿讀我友繡谷翁種學恥
徵逐盡出橐中金萬卷購連屋述作資見聞校勘
窮反覆同心有數子牽連乃到僕渠成亦秦利借
寫誇眼福剪韭論深宵對榻就家塾每歎津逮難
散亡思並蓄翁俄爲飛仙墓拱十年木有子能繼
之衣食自節縮蒐羅及叢殘更續西齋目唐吳兢
有西齋
書昨去長安游閱市淚滿笏詩題丁卯橋手澤喜
重復紛紛紈綺兒膏梁果癡腹諒哉坡公言如倚
几折足東坡詩世家不可
恃如倚折足几插架本無多易炊只供

鸞凌雲當一笑知勿恨雌伏

中秋夜感舊

疎簾髣髴見明姿碧浪湖頭月出時正沈寥天無處覓最團圓夜似來遲鍾陵甲帳淪前謫魚嶺遺衫斷後期折得秋花香在手鬢雲猶記一枝垂

九月三日曉行西馬塍作

行過馬塍廟背湖西復西天清山色近曉冷葉聲齊秋水苔川似荒烟菌閣迷幽偏詩易得不盡古今題

南宋苕川宋伯仁寓居西馬塍有西塍臺元張伯雨有菌閣在西馬塍

重過南湖有感

路近南湖已怕行舊游無處不傷情翫梅小院疑前夢聽雨閑房似隔生衰鬢照來秋水碧愁心敲破晚鐘清空王應念迷家子一縷天香卽化城

書沈約宋書後

門外常停貴客車
一生餅鉢托京華
黑衣宰相人閒少
著論翻教毀釋迦

寄題蔡效清竹寒沙碧山莊二首

在武康餘英溪

上永安山之麓

攜得琴書住翠微
不關人事爲無機
禽聲似聽前溪曲
雲影堪裁大布衣
生壙預題當樂死
浮家翻笑竟忘歸
竹寒沙碧幽深處
添種梅花雪四圍
清溪逸士地行仙
抹月批風不記年
愛選好峯撐屋角
別穿流水入階前
少霞字重新銘在
東野居荒古井傳
想見嘯臺高幾許
待將詩句問青天

抱雲峯

并序

敬身得靈壁石高五寸許數小峯環峙其下中窪

如壑最高一峯上有白脉縈繞而達於背髣髴雲
氣也叩之聲清越良久乃已予爲名曰抱雲峯時
敬身小疾初起又得宋高孝兩朝賜楊和王御札
墨本所襯紙是至正間海運冊子皆希代之玩也
好事而具鑒識往時里中前輩人無如敬身者敬
身索予詩乃用元遺山賦武伯英雲巖詩韻以遺
之

幽人病起學鍊顏江村寒寂鴉影還帝遣靈文傳
十賚先以泗濱之硯山似聽松聲吹壑底森然卻
立丁香鬼洞天一品未足奇劒倚千尋令公喜

米元

章有洞天
一品石

玉女衣披巫峽雨胡桃文浹青泥髓客

兒有句寫幽抱笑殺巴音歌下里片帆欲往搜湖
嵌君今繞案浮烟嵐吳興風篁響清絕漫費琴絲

窅碧巖

趙子昂以絲絃繫太湖石兩竅立

之齋前風過有聲如琴名風篁石我媿心

魂未齋被螺子應爲賜湯沐故家好事譜空青無

此玲瓏袖中物

五代李贊華有奇石一峯目曰空青府

閉戶看山道

自尊出岫已嬾如幽人雲根莫道慳膚寸望拜三

峯禮七真

鮑貞女挽詩

地下仍歸妹人閒免嫁殤仙娥宗鮑靚奇節邁共
姜置蓬因君舅勞心撫小郎休言孌弱女生氣凜
如霜

湖樓題壁

水落山寒處盈盈記踏春朱闌今已朽何況倚闌
人

種蘆次趙谷林韻

詩人寄興屋三間移植蘆根爲破顏底用評花十
戶賦偶然弄水一冬閑筍抽春味無過淡葉戰秋
聲只守孱敲枕便成孤艇夢梢梢瑟瑟暝忘還

菽乳和許初觀

巷南有髯許高情薄侯鯖袖出菽乳篇不異月旦
評覩縷衆饌法語妙朱絲鏗吾聞古緯書豆爲靈
殖精澂之塵垢淨礪之風雨并囊壓粗滓去勺攪
流膏澄炊若馬酒熟凝以鹵汁賴餘泔滿匱棄素
質盈箱盛日中咄嗟辦用佐蔬筍烹淮南好道術
方士趨虛名黃金不可鑄遺誤劉更生但傳服玉
方千載猶施行

虞作生豆腐二德贊
云肘後服玉舊有方

瞿曇全其慈

萊蕪益其清惜哉柱下相齒落無堅城當時未噉
此致煩諸娑嫫我老滋味薄杯案焉取羸才媿東

家子無能發芳聲泚筆聊繼詠口福徒營營

題王鑒徵義橋村齋圖四首

攻文惟汲古羣笑不逢時屢罷三年舉翻爲一卷
師書聲穿樹響人影過橋知瀟灑吾廬似斜陽入
硯池

閉戶焚香坐深憑地主賢課餘看藕蕩飯飽步秧
田里社碑能作村齋句必傳圖中小平遠風物憶

斜川

蔡邕有庫上里社碑村齋遺事詩金入黨懷英作也

小學今多廢閑居世可逃蟲魚箋爾雅草木注離
騷有暇談農事無人見緼袍相尋應不遠河水劣
容刀

腹便君自得影質久相忘婉婉諸童子清清此草
堂缸開問字酒牢臥束脩羊歲晚歸期近眉閒色

正黃

津門查蓮坡和予移居詩四首遠寄次韻

奉酬

風烟迢遞兩鄉餘遠道何由接起居寄訊但憑雙
鯉腹將詩好敵百車渠宵來半面通清夢海內詞
人問敝廬強比成都一區宅那知身擬老爲漁
神妙秋毫欲到顛水西莊畔有吟仙襟題柯古初
編集琴訪成連賸刺船丁字沽分帆歷亂角飛城
對草芊眠討春衝凍相思句傳唱江南直萬錢

君家

水西莊有數帆臺攬翠軒枕谿廊諸勝衝凍
每尋孤嶼寺討春時上暗門船來詩句也

我住城東小徑斜知君也入昔游誇當時失把林
中臂幻境如飄席上花變姓不隨齊范蠡舊人誰
是魯朱家新來見說耽禪味手寫楞嚴浣俗譁

擾擾輪蹄已習聞，達人自著百年勲。飛觴坐上知無數，拜爵田閒不復云。驟雨新荷催度曲，青天明月惜同羣。爲君傾盡金壺汁，他日蠻牋更待分。

谷林和予菽乳詩，令子誠夫亦繼作兩篇，並示詞義兼妙，用前韻爲答二首。

通腸僅脫粟，醒酒需佳鯖。美惡舌三寸，過此奚煩評。儒生例說食，金石侑鳴鐙。脣豆與熬豆，經術俱研精。誰令爲此乳，淋漓原泉并。截肪白未喻，挹漿甘而澄。持餉衛霍室，幾逢薄怒黷。彭亨盜囊腹，詎肯半菽盛。天水賢父子，句法妙煎烹。朋牋遣俘遞，澹泊如自名。野夫久習嬾，著論師養生。榆瞑豆則重，復恐妨游行。愛茲玉液鍊毛骨，資輕清經年抱愁疾。寒影依江城，調羹憶葱指。零落傷閨嫠，塵滿

舊屏障悼亡詩最羸往尋鍛磨齋夢覺香梵聲一
洗綺語債淨饌先經營

有梁劉孝儀食愛具溪鯖五侯與九伯七箸供閑
評量腹節所受年可齊彭鏗奈何蜀黎祁不預膳
品精仲殊禪林秀每令蠶糖并谷神濯垢膩胸似
水月澄或點菰葉碧或糝薑芽蘋當其入市初合
伴筠籃盛此族徧燕朔不止誇南烹固宜儒者餐
而獨以腐名雍雍魏三士踽踽魯兩生風味與之
肖迂緩難偕行時乎遇寒凍乃抱冰棱清端居喜
博物匡坐擁書城豆花號腐婢小圃垂嫣嫵豐年
百穀遂瓦缶縮且羸流傳勝酥作唱和如同聲

翁詩新壓黎
祁輒勝酥

岐亭凜殺戒刀机無異營

意林更出新語和予菽乳詩伴黃梅花見

遺仍疊前韻爲報

叩戶送詩急有如裏芳鯖一門萃三俊正用臞翁
評叔也壓強韻灰裏撥陰鏗吾觀服食類以乳名
最精石乳誇丑座侈與金釵并茗乳潑南唐破睡
心神澄若將菽乳比儉薄應羞楨不聞郊廟祀嘉
栗先粢盛已熟豆子兩何減函牛烹漢竇實豪宗
同出多異名

明洪武中慈溪時銘季照夢墨藁有寶腐傳

熏胥竟自薦

酒國方全生或襲鴟夷號亦冒人銜行雖非他偈
處終遜玉雪清君詩獨後勁偏師欲乘城燒之蠟
花枝佛妝綴燕嫔我亦怯穿縞敢恃突騎羸誰言
譜蔬食卻似聞軍聲
陳

達叟蔬食譜豆腐條淡羹蘸以五味爲啜菽

冒寒肺疾復作偶誤食肉委頓數日意不

如菽乳之佳也四疊前韻寄敬身高士索

和

鄒平鍊珍廚惟數膾與鯖我輩酸寒句俗子休嘲
評物小義斯大春麗兼鯨鏗食時持五觀無如菽
乳精往苦徐家肺不飲疾亦并得風輒呀呷晏坐
妨幽澄燒豬偶在御鼓頰如梨頰比日廢中飡藥
盃琉璃盛何惜三錢握買取片玉烹似擇水中乳
法味難強名淡成等良友美疚違傷生况復詩家
景每工說曉行釜搖壁燈短店開山月清異彼老
餅師有暇唱渭城執爨霧中花力作助吳嫔因思
售者勞勝貧匪期贏力勝貧出論衡而我晚失學久負荒
雞聲投箸起三歎媿此空屏營

十二月十五日雪中同敬身集谷林南華

堂觀蜀廣政石經殘本宋廖瑩中世綵堂

刻韓集作

園林蕭瑟雲模糊角相與尋清娛南華堂前好
水竹梅枝橫出爭盤紆六花高下舞崑岫似聽蟹
爪行殘蘆頃之灑粉漸照坐駝裘烏帽主客俱分
茶說餅解寒色天生一櫳重屏圖凋年似此頗不
惡況觀寶刻開香廚孟蜀石經僅一卷張紹文筆
嚴形模周南疑誤辨朝字怒如調飢石本月令注
釋亡哥奴毛詩儀禮禮記俱校本以月令爲第一李
林甫奉敕注見秋壑翹材有首選特築世綵臨西
湖雕鐫韓集稱善本紙墨精好久不渝降王狎客
兩寂寞等爲亡國夫何殊流傳幸有經籍在千秋
差免諡至愚武林城中十萬戶纖兒綺榻圍溫爐

雪中那得二游合冷淡生活笑異趨詩成喚起鹿
門子任徐今不居東吳

奉題旌門桑孝子文侯先生抱鐺圖

先生名天

顯

君不見陳遺鐺底焦飯母是飴何如桑孝子父病
鐺底煮肉糜父病噎胃神乾燥食漸不得下肉糜
滑甘何如羊脂入啗易化久之疾革欲進羊脂亦
不可得人命一何促難奪鬼伯手唯有抱鐺哭霜
氣穿破屋風聲吼喬木鐺有耳不聞此悲哉抱鐺
桑孝子

樊榭山房續集卷二

樊榭山房續集卷第三

錢唐 厲 鶚 太鴻

詩丙

新正試筆次許初觀韻二首

以下
癸亥

春來光景盡依然少壯心情可似前
漸茁霜髭明鏡裏自回青眼野鷗邊
絃歌漫欲營三徑書卷猶應悔十年
留得梅花冰雪後南鄰北里任熏天
結習分明著意刪置身逋客定僧閒
無方醫俗誠堪恨遇事稱佳亦強顏
鬱壘我纔勞紙墨醉鄉君且小塵寰
閑中檢校關心處除卻哦詩不復關

八日集施北亭齋中

一櫂河橋踐宿盟新年轉見舊交情
詩過人日陰猶在簾受東風雨易生
魁陸羹材關節物卷波酒

令入春聲尊殘又送蘋洲別無數青山逐夜行

特數

復之
湖州

攜姪黼登吳山西爽閣望湖上霽雪

十日鴻雪天乍醒金鴉展翅光隴吟春寒留此幻
玉在急攜阿買行伶俜風扶兩腋上絕磴墮簷冰
柱來殊庭庭中萼綠華已破童子輟誦靈飛經西
偏爲我開小戶翻身跳入申徒鉞全湖只在几席
下峯圍銀浪搖窗櫺頗黎盆盛新水滿中有璇館
浮如萍城陰練練鋪萬瓦蓋盡塵界濁且腥林梢
陽燄動未動太素境欲還始青眼前梨雲尙就夢
畫裏竹葉看揚舲恐教歸去洞天閉追摹懔恍忘
真形笑渠序白乏奇語詩成唱與羣仙聽

顧丈月田遺羅浮丹竈泥

尋真高步向羅浮曾向沖虛觀裏游九轉已成仙
歲月一九猶帶晉陽秋虹光幾度崑頭現赤堦今
從掌上留學取方回封戶法也堪獨往謝凡儔

次韻顧丈首春臥病遣懷四首

無奈春寒勁折繇劇談全似破枯禪泥乾久積庭
陰雪日薄遲生水際烟臭味相憐同故疾心期取
次得佳眠扁舟雙屐須料理肯把風光讓少年
熏爐未忍別奇溫誰識先生冷意存不用書蒙子
公力何曾裾撇季長門秦關跋馬峯形壯粵嶠塞
裳海若尊一笑枕中春夢醒祇如鴻爪了無痕
新年準擬暫開顏有約晴街散痺頑老境那能三
好具春光常是二旬慳

昔人言一春好天
氣不過二十日

茶勳藥

福銷除病選佛期仙占斷閑拚卻窮陰過買夜尙

留梅月照屏山

覓句無妨一字貧
蕭然硯北自由身
眼空寓物非
留物齒冷逢人更
閱人雨水已來芳草動
麴塵漸放柳絲春
高車近見多傾覆
不但長途畏獨輪

落梅二首用二宋落花韻

曲折疎籬亞字牆
春風顛倒月荒涼
吹來笛裏無窮恨
飛墜樓頭第一香
漠漠烟中疑玉面
鱗鱗苔畔卽黃腸
綠陰青子差堪念
不道空枝更可傷
老眼逢春益自傷
花光寫貌最難忘
隨風罷索巡簷笑
著地回思照水妝
幾點鹿胎餘舊跡
一痕獺髓浣殘香
參橫爲乞相思夢
雲影依稀護石房

和沈房仲論印十二首

白玉摩挲衛青篆
虞家題詠陸家收
姓名偶爾存

天壤騎從何知是列侯

陸友仁有方寸小玉印文曰衛青虞伯生詩云將軍

騎從公主時豈意刻玉為文章

葫蘆宮井訪斜曛官印濃摹宣德軍閱過土花錢

又趙絕無屈曲少人聞

康熙壬寅子同吳尺鳧趙功千丁敬身鳳凰山訪古

過葫蘆井畔老媪家出觀銅印一鈕縱廣二寸許小篆文曰宣德軍節度使之印云淘井時所得欲

買之堅不肯墨摹其跡以歸明年重過老媪已亡印不知流落何地矣按周顯德六年從吳越王俶

行之請升湖州為宣德軍以王弟俶為節度使吾子行云凡摹印屈曲盤回唐始如此今觀此印殆不

盡然也

兵象輕將漢印論誰言好古是雲門行閒別署軍

司馬狂草淋漓詫醉髡

雲門張紳云天下皆用漢印于名字之閒陰文屬兵

象大唐傳載云永州龍興寺乃吳軍司馬蒙之故宅懷素嘗浚井得軍司馬印每草書用此為誌

四牒爭誇白石藏紛紛鍾鼎費評量好奇更有王

都尉卍字回環吐佛光

姜堯章有白石生四牒印王晉卿有小印文曰晉卿

珍玩於已字
中回環刻之

珍祕永存虛語耳明昌七印繼宣和世閒名蹟俱

塵劫不見袁荆簿錄多唐王涯有永存珍祕印金

葫蘆印二曰羣玉珍祕三曰明昌七印一曰內府

御覽五曰御府寶繪六曰明昌中祕七曰明昌御

府嚴分宜書畫被籍入內府穆宗時出以充武官

世祿成國公朱希忠以善價得之後以餉江陵張

敗又遭籍沒掌庫宦官盜出售之其入嚴氏時有

袁州司籍官半印入張氏時有荆州司籍官半印

一自山農鐵畫工休和紅沫寄方銅從茲伐盡燈

明石僅了生涯百歲中王元章始用花乳石刻私

見明石可刻圖書印

明石可刻圖書印

見郎瑛七修類稿

故瓦苔皴出未央曾傳金粟道人章時時韋帶穿

爲佩真樂無如吾竹房顧阿瑛偶得未央宮故瓦

印吾子行有竹素山房我最懶懷真樂飛丹霄數

印印鼻小韋帶嘗在手弄之欲和其四角令有古

意

閉關頌酒屬蛾眉七首夫人擅巧思不見雉臯雙

窈窕書中有女畫中詩

宋奉華劉妃有閉關頌酒之裔印予嘗見明妓徐驚

鴻書扇印文曰徐夫人皆以婦人用男子事徐更巧合又嘗見冒辟疆姬人金珣蔡含合筆畫紅梅

玉茗小印文曰書中有女畫中有詩

追仿蟲魚枉用猜底須獵碣辨纖埃祇宜規矩斯

冰體好爲偏旁正誤來

何震密疎能結構文彭精巧更紆餘許

初徐霖歸

文休李流芳風流在善謔應推孫太初

孫太白山人

多自制時有方唯一者眇一目而善謔孫爲制一印唯一每書輒用之李獻吉戲題其上曰方唯一

目印制甚曲信是盲人罔覺其俗唯一知而亟毀之印制乃朱文三字相連而橫界其中寓目字也

見徐元懋古今印史

貴主當年重品題劫灰湏洞賸懸黎皜臣死後良

工歇切玉何人更似泥

予友趙欽谷曾得明樂安長公主小玉印篆刻極精

予爲作歌周櫟園侍郎云自江靖臣死無復能刻玉者矣

絕藝吾鄉豈識真布衣前數顧山臣城南詩老推

能事肯刻龜螭與貴人謂丁敬身

同許初觀游城北興福寺寺爲宋薛左丞昂捨花圃地建

新晴無伴與經行元度能消世外情鄰叟誰知左

丞圃野僧不避太師名疎疎綠竹穿空地澹澹青

山見隔城漫道賢愚同是夢黨碑千佛至今榮朱弁

曲洧舊聞云國子監無名氏題元祐黨籍碑曰千佛名經

三月三日同許初觀訪魯秋塍山長於敷

文書院卽事有作二首

萬松難覓昔人栽勝地天教講席開嶺上白雲閑
不出湖中空翠遠還來先生正值成春服都養猶
能治酒杯醉向層巔問蘭渚越山如髮隔江隈

長風不斷送雄談上巳毋忘此盍簪詩國芳情花
作骨儒門淡味水回甘曲江名噪同秋賦禹穴書
奇約晚探乘興重來寒食近十分穠絢看晴嵐

同少穆竹田敦復南漪飲吳山酒樓時桃
始花薄暮汎月歸諸君送予至西橋別去

青山繞郭宛游龍對酒烟光分外濃春入花枝燒
客眼望窮雲海盪吾胸懷人袖有三年字倚健身
辭九節筇歸艇市橋穿月影一時笑語最從容

西顙將
南歸

時聞

徐丈紫山沒三年矣聞湖上故居名黃雪
山房者已拆賣於人雪樵有詩弔之予亦
次韻

逸氣凌霄一劍飛眼中人物似翁稀百年無地悲

華屋萬古空山隕少微春雨如聞吟屐響夕陽不
見釣船歸門前鴨腳青青在爲訪遺蹤淚滿衣

題沈石田蹇驢覓雪圖

兩崖對矗寒空峭霽色雲端迴相照瀑冰挂折板
橋低千丈玉龍尾不掉山腰居人下無路狐兔
近迷窅篠疎林敲倒深礪埋獨凭危闌展孤眺長
耳衝風前爲誰袖裏鞭梢若垂釣後者據鞍自呵
手涕凍鼻中強爲笑乾坤清氣入詩脾口不能言
領其妙君不見歇後鄭五作相時心腸冷落無人
知風雪灞橋驢子上何如二十四考居台司又不
見黃山先生句得髓圭璧絮鹽良可已詩名世號
趙蹇驢何如頭鵝獻罷吟春水昔年眯眼輒塵紅
鑿冰不到河伯宮寒風密雪郭熙畫張之秋暑銷

熾熾

丙辰秋日在長安觀郭熙寒風密雪圖於徐亮直太史席上

此圖物色將

毋同眼明今見石田翁安得人閒五六月移置覓雪圖當中我當爲文策拜廬山公

寒食同少穆初觀城南看花用東坡上巳日攜酒出游韻

熟食例多潑火雨江吐微雲徧村塢三點五點欲霑衣見慣山童不我侮雨收沙路輒且平斜上層岡勢交午林中百舌哢春聲似與游人相爾汝遺民那記白雁來近岫猶看青鳳舞東風吹返美人魂楊妹劉妃心獨苦叢叢幻出淡燕支似倚牆頭懷故主微聞流水響佩環邀取新蟾鬪眉嫵意行復入古梵宮礎斷方花臥黃土西番佛塔滅遺蹤廢井桔槔灌蔬圃黑龍飲器閱金陵真帖蘭亭迷

處所木波不見老講師畫壁烟銷執爐女一十六
年追昔游存歿關心首爲俯吳尺袁舒沈欒子已

泉下泉下傷春寂無語杭子

宗大

上書方待罪丁

敬身

趙

功千棲

遲掩衡宇荒祠依舊祈蠶宮漠漠輕陰

咽簫鼓重來白髮映花紅只有尊前周與許平生
不數蔡克兒送抱推襟兩無阻憑君妙句發天慳
歲旣晏兮孰華予

次韻顧丈月田以羅浮竹葉符見贈

我生探奇心未暇歷幽竊側聞羅與浮合離冠海

嶠劉仙有古壇解種不秋草

金人馬天來賦竹句云人天解種不秋草

亭亭挺明玕主人後天老夜吸沆瀣杯揮毫向翠

葆淋漓太平符糾繆龍蛇繞至今留靈蹤葉葉出
意表蟲蝨并蝸篆屈曲疊微眇可遇不可求詎屑

釵頭裏閑居窮山經類不遺細小晚逢丈人厚詩
格倍精好先以丹竈泥圓如芡堪齧次第贈數翻
片碧觀天巧書癡笑識字學媿蟬魚飽何況雲雷
文多怪緣見少更聞玉局翁灑墨亭山曉竹間葉
點斑感物豈異道安得手摘之與此爲二寶東坡過瑞昌亭子山題字石壁點墨竹葉上至今環山之竹葉上皆有墨點出僧道璨柳塘外集願尋
絳囊佩同試鹿盧躋虎豹跡俱潛鴻蒙首初掉鞬
翔雙髻峯名嶽恣搜討問年將書亥禁飲休犯卯
齋心訪隱訣一御籜龍矯再乞安期蒲坐令白髮
掃

原作

仁和顧之珽搢玉

羅浮耀南離巖嶸深且竊玉乳與金膏隱現半
霞嶠陽崖產肉芝陰澗生朱草遇之一採茹換

骨能不老所嗟塵世人入目等蓬葆常聞十三
峯籠篳萬竿繞圍徑二十尺其長矗雲表作篴
環無端節目窮要眇葉大如芭蕉風來綠裊裊
更有劉仙壇符竹卻瑣小高祇數尺強單複各
佼好一葉兩葉中篆籀若蟲齧枯腴自區別紋
畫甚儇巧余昔展衰步探歷未曾飽今以轉贈
君博物理難曉云可辟不祥符錄有至道稚川
載登涉引據按靈寶抱朴子登涉符引靈寶經以保日義日爲吉入
山宜佩之舉足任蹻蹻精鬼俱遁藏虎狼皆震
掉留俟五嶽游幽奇遂徧討毋須擇天禽書符以天禽日宜入山
不待覓剛卯諾臯及太陰祕祝多僞矯
惟有攜此符諸術盡可掃

清明後一日魯秋塋招同顧丈月田許初

觀看花山中分韻

城南約在許再攀風磴直上礬頭山故人喜作此
山主看花不用開門櫃緣坡蜿蜒得細路長紅小
白爭妖嬈玉壺臺邊富奇石一花一石相回環花
梢湖影展曉鏡諸峯浮渲梳新鬢風光如此可不
飲酒脯更破先生慳興酣花下或成夢夢作胡蝶
飛翩翩我輩幸無世網縛豪氣豈受名流謾笑看
修竹有彈事合羨野鷺多清閑芳時晴景古難得
處處拜埽呈膏糗只愁明日風雨驟碧翁善幻如
黎軒吳牋襞就字草草醉語請君方便刪

次日顧丈載酒邀同少穆初觀就飲秋塍
於山中同用昌黎山石韻

宿雲岳際光熹微昨日花好今日飛初飛幾片花

尚好莫待綠葉枝頭肥人云虎頭最癡絕迎繁送
謝世所稀挈壺攜榼到故處愛花汲汲忘朝飢空
山寂寞二百載但有弦誦關林扉天賒勝事在今
日紅蕤素萼吹霏霏狂歌豪句裂崖石轟飲一解
酸寒圍酒痕未洗此又婉莫惜白苧裁春衣長恨
古人不見我六龍羲御無停轡請君試聽陌上曲
斜陽自逐香車歸

西顥自都下歸里數日卽有閩中之行詩
以送之

一尊三載得相同過嶺輕裝趁曉風舊雨能來今
雨外歸程并在客程中舉旣書好才稱捷橫槊詩
成氣自雄

時客將
軍幕府

春盡到逢丹荔熟平安先報海

天東

題周少穆所藏馬和之小景二首

畫上
有楊
妹
子

題云雨洗東坡月色清市人行罷野人行
莫嫌犖确坡頭路自愛鏗然曳杖聲東坡
黃州作也

六飛當日駐錢唐曾畫毛詩馬侍郎五百年來遺
墨盡秋林曳杖見吳裝

便娟小楷媚多姿似見楊家弄筆時南渡已無文
字禁宮闈也愛寫蘇詩

諸公詩來兼詠山石予詩似有未盡再用
前韻賦一首

畫水最數孫知微崩灘駭浪勢欲飛畫石最數畢
京兆深坳淺凸瘦不肥誰知石亦有水勢萬松嶺
上見者稀突如灩澦數閒屋險如盤渦掉蛟飢軒
然大波逼簷際諦視始覺居巖扉山中之人以爲

玩飽此朝暉與夕霏今辰分取更供客青鞵同闖
書城圍看花酌酒枕石臥白雲冉冉生我衣山空
晝寂衆禽響嘲客徒步無金鞵金鞵不若徒步穩
醉踏花影敲斜歸

穀雨前一日同顧丈月田周少穆金壽門
丁敬身施竹田吳敦復張南漪泛湖二首
落花片片點衣斑湖上佳游尙未閑人影不離春
水舫詩愁都在夕陽山漁莊欸乃烹蓴去僧院留
連試茗還爲謝垂楊如舊識白頭慣見舞弓彎
年時春思盡銷沈老去湖山興不禁擬拜東風侯
萬戶誰遮西日價千金梨花酒熟江城晚杏子衫
輕水寺深容易隄邊各分背數峯平遠又成陰

同作

錢唐

吳

城

敦復

三分春色漸成空，猶有殘花爛漫紅。
病酒不嫌新戶減，看山更喜舊游同。
雨前槐火催煎茗，扇底香塵暗度風。
如此晴湖應見慣，尊前大半白頭翁。

同壽門敬身登寶石山天然圖畫閣予不
游此已十四年矣用前韻題壁

山樓孤絕少人登，妙友同凭記昔曾。
林氣暖時濛似雨，湖光空裏淡于僧。
畫尋白石無殘墨，沈啓南曾寓此
榜牘樗寮有瘦藤。湖山勝概扁張卽之書
十四年來筋力減，峯頭直上笑猶能。

桑弢甫水部買得元人百家詩後有小牋
黏陳氏坤維詩，蓋故家才婦以貧鬻書者。
惜不知其里居顛末，爾讀之有感次韻一

首并徵好事者和焉

姓字深閨豈易知偶傳紙尾賣書詩難追寫韻仙
家事應共牽蘿絕代悲彤管更添高士傳墨卿別
注有情癡迴腸似共縑緗往惆悵令人展卷時

原作

陳坤維

典及琴書事可知又從案上檢元詩先人手澤
飄零盡世族生涯落魄悲此去雞林求易得他
年鄴架借應癡亦知長別無由見珍重寒閨伴
我時丁巳又九月九日廚下乏米手檢元人百
家詩付賣以供饘粥之費手不忍釋因賦

一律
陳氏
坤維
題

訊筠谷足疾

杜門計好合逡巡謝遣庸醫病未真宗少文爲臥
游客白居易作坐禪人香山詩足輒
妨行便坐禪枕邊書卷敲

翻午樓上花枝遠望春猶有不妨談笑處祝君將
護長年身

足疾臥牀已閱一春穀雨日蒙樊榭枉存
并慰以佳什次韻率錢唐和鄭江璣尺

無復澆愁酒數巡科頭偃臥任天真讀書未必
窺全豹閱世誰憐號半人重惜鶯花三月暮空
辜平遠一樓春勸君努力追懽賞領略風光現
在身

廣陵同人招集花畦看芍藥四首

三三徑在豔香中窗戶玲瓏一水通尚有江南寒
意思留人四月賞芳叢

又是揚州櫻筍時三年前事費尋思重來也擬修
花譜不道劉郎鬢有絲

分畦結屋祀花姑金翦甘泉雅稱無為向惜花人
說道曉來風露不禁扶

風吹笑語隔簾波畫舫輕移此處過我與王郎揚載

同是客玉杯情重主人多

漢銅雁足鐙歌為半槎賦槃下銘云竟甯元年護為內者

造銅雁足鐙重四斤十二兩護武奮夫霸

據廣漢主右丞賞守令麋護工衣史不禁

蒲阪首山青逶迤黃帝鼎成龍胡垂戰且學仙事

絕奇茂陵劉郎始祝釐流傳奕葉敦書詩猶崇祀

典敞雲楣妍蛾無舛夕侍祠金釭如虹摻手攜望

靈之來月出時神光下屬風披帷翩然而逝不可

期勞心悄兮煎蛭脂陰精沙麓祚始衰效祥安得

齋房芝後代蛤彩瑩瓊肌不照綠綈方底兒此鐙

行第人見之細數瑤瑟彈冰絲銘字儼如沙畫錐
內者嗇夫掾丞今年是竟甯嗟已竟制器尙象古
示儆隨陽有序亦天性銅花涵碧秋水淨雅勝羊
頭與鳳柄夜涼可親宜放鄭千年瓠史寄閑評君
家自發短檠詠

五月二日集小玲瓏山館觀李遵道古木

幽篁圖

款云至治癸亥十一月廿有五日
李士行遵道製

溽暑集林亭軒窗喜塏爽黯慘尺幅中風枝互偃
仰此君~~時~~醉日晚筍穿幽壤因依青銅柯挺挺絕
無黨要之氣味同詎作榮枯想薊丘名家子畫法
不可兩筆傳金錯刀格肖珊瑚網盤根積溜痕密
葉分泉響題字正癸亥事與年簫往駛雨送微涼
偏宜今日賞

同人攜茗集張漁川齋中試惠山泉用涪

翁韻

吳客遠來好風俱扁舟載泉兼載書梅龍貪睡鞭
不起分得數斗鱸塘珠鬪茗須鬪芳而腴羣賢列
坐鐺腳如嗟予微疾不能飲湖目但思蓮子湖

病戒茗煎蓮子代之

同作

臨潼張四科漁川

平泉飲水置驛俱好事應得牽聯書瓦罌遺我
作茗會旗槍鬪試湯翻珠舌本小啜甘露腴米
老稱兄我亦如當前一任僖父誚渴吻直欲無
江湖

漢銅龍虎鹿盧鐙歌爲敬身作

銘四字曰宜子孫吉

今年曾詠雁足鐙新詩傳唱滿廣陵歸來江上

高士又見一鐙奇可稱鐙似舟形本無足亦非錠

中堪置燭

呂靜韻集無足曰鐙有足曰錠徐鉉云錠中置燭謂之鐙

偃則爲蓋

仰爲盂盂迺有味中有軸鹿盧一轉一惆悵心在

兩京千載上焚蘭照影復何人可憐漆炬迎幽壙

孟底鏤文出良手青瑯素威分左右

後漢書張衡傳左青瑯以

捷芝右素威以司鉦注青龍白虎也

銘銜三字宜子孫子孫今日知

誰某廬江李氏昔得一獨少義文片辭吉江淹漫

歎庶人鐙充庭豔帳何堪述與君莫師無眼禪頂

禮白石蓮花前燈傳無盡詩無盡試與佳兒誦此

篇

曲陽孫晴崖明府寄唐北嶽廟李克用題

名碑拓本

咸通以後唐運徂黃家日月誇休符狂童犯順據

帝座天子下殿奔成都淮南節度靜如死滎陽相
國憤不蘇易定將軍哭隨駕號召大帥行天誅雁
門九郎勇蓋代義兒奮迅生馬駒望春宮前蹴踏
處沙飛瓦震相吞屠都都統論功第一收城建義
應無殊翠華自此亟返正王公封賞懸非誣英雄
不殞上源驛力爲姻舊親援枹膽落幽鎮兩兇豎
講和解甲歸飛狐猶恨汴讎未遽滅矯首東望鬱
以紆是時道出安天廟同申祈報憑靈巫誰知光
嶽已分裂惟有正直神所踰銀鉤鐵畫隴西字多
年風雨龜埋趺我友牽絲政優暇命工構屋看重
扶一番拓寄正炎夏凜凜勁氣生眉須

秋齋夜宿

新秋未徂暑夜氣先侵簟空館心悄然求夢翻成

魘醒聞竹聲喧播蕩仍掩斂祇有故時簾因風時
一颭

次韻敦復秋夜有懷堇浦

秋夜懷人百不宜憐君去國意遲遲上書北闕身
無補祖道東門鬢有絲鶴睡已知更幾轉蛩吟漸
覺歲將移歸來仍是南村伴酒釀燈明共賦詩

題友人讀書圖

人言明山賓讀書何堪官君胡讀不輟豈樂在考
槃不見當路子百年但笑端臧穀等亡羊我自惜
跳丸仲任苦閱市令狐常借看況此籤帙富津逮
知非難是身椰子大萬卷何處安憎人異郝公中
有渤海寬

秋夜不寐

蕭然敲枕有餘清疑是千林訴不平一室青燈和
月暗滿空涼雨挾潮鳴心依故處偏多感秋入衰
年最易驚只恐明朝攬圓鏡白鬚新見兩三莖

七月五日滿月精舍同汪旭瞻坐雨用東

坡韻二首

人生違鄉閭膠擾徇所務念子歛浦來寂寞早秋
度相從問字餘香飯青蔬煮坐聽窗前竹雨腳喧
萬縷風驅雲行西一席天影露起祝盃底龍四野
待傾注

雜樹響城隅蔓草泫城上此閒夜色幽想見佛燈
亮旣霽行歸休野水有微漲緬昔白駒張畚築事
一餉

杭城爲張士信重築東城
拓地三里至今曠如郊外

閱人甯足計望古

吾何愴長歌敵秋氣放士老更放

西林過滿月精舍

不見幽人久
香林興獨乘
學多先識字
年長欲依僧
竹影埽空壁
蟲聲棲壞塍
秋蟾圓幾夕
靈鷲約同登

齒痛

齒剛每先折
古語良非虛
病因從口入
致此溯厥初
吾生歷荼苦
嗜甘迺其疎
見飴若養老
得密如瘡除
遂令齟齬內
有妖爲安居
鑿似蛙蚰石
動比飢餼車
秋來忽作楚
呻吟廢翻書
五十又過二
早衰惜居諸
世味已飽諳
長此安齟齬
但憂卽漸墮
齟然無復餘
少留了殘齋
丹朱許我歟

龍魚河圖云齒神名

朱

雨中金燈花

盡日淒涼雨叢花照素秋碧粲看最瘦紅豔欲俱
流有淚長門夜無人小院幽更憐湖畔路翠燭冷
颼颼

秋曉同旭瞻湧金門外渡湖至金沙港

山游屢有期人事每牽紕昨因林僧約蓐食興始
決適茲積雨餘天水共澄澈宿雲脫諸峯秋鏡眉
影列我舟戡其中秀色飽攬擷俯窺魚乘空樂意
兩無別環洲渺荷芰樓臺互明滅去去最宜人涼
蜚鳴不輟

行春橋道中

石橋橫澗曉登登臨水時逢洗鉢僧踏破秋光入
松影不辭路滑訪南能

游靈隱寺巨公飯予於面壁軒

去年秋雨聲蕭颯面壁軒中寄禪榻曉起推窗失
四山白雲正滄神尼壩今年秋霽風灑然鑠頭重
舉舊因緣隨時喫飯看山坐不是諸方五味禪

巨公重建春淙亭於清繞橋詩以落之

高僧能復古結構樹陰閒倚檻宜聽水登橋好看
山魚隨落花出龍帶晚雲還只在斯亭下來春賸
占閑

下天竺寺後尋三生石

秋滿空山草樹平澤公遺跡此經行風篁解笑有
真意蒼石能言非俗情浮世無端傷往事故人何
處話三生
裴回欲問林閒笛桂子峯頭待月明

書柘湖張龍威長短句後二首

踪跡江湖燕尾船一回相見一流連新詞合付兜

娘唱可惜紅牙久寂然

樂笑翁今不可回補題五闋屬清才薛家鏡子塵

昏後悽絕何人喚夜來

龍威有和子續樂府補題五闋其天香賦薛鏡云粉

潔休磨塵輕不染識取夜來名字深有感於予懷也

堇浦歸里同諸君過報國禪院池上分得

時字

故人罷官歸水月同襟期秋聲了不聞如僧退院
時坐石鳥下樹叩檻魚出池夕陽沒荒城歸去無
人知

夕次石門

望望石門縣秋烟路欲迷村深忘遠近月出辨東
西桑影過橋密蟲聲傍水低吾衰怯風露敢後暝
鴉棲

過嘉興

不到禾興郡於今又八年
尖頭學繡塔平底載花
船波冷鴨羣語風高鷺
獨拳只除鬚鬢改何處不
依然

曉登虎丘別戴綸長

風吹青桂枝石徑何嫋嫋
言登千人坐放眼閱清
曉片月尚樓角初陽已
塔杪香殿上盤旋飛梁
俯幽窅兩崖裂秋碧槭
劍天影了直臥古樹深
倒聽墜葉小地勝忘羈
游心清絕魔嬈故人此
爲別益我迴腸繞遙知
陟層顛雲帆在縹緲

晚過梁溪有感

九龍之山山九峯峯峯
晚秀凝雲松我見青山
輒心喜青山見我如爲
容廿年來往梁溪道可
憐不

珍傲宋版印

見青山老繭紙題詩此際同竹爐煮茗當時好三

面看山暝色催舊游零落使人哀昔年惠山主人

吏部薨林俱已物故依稀第二泉邊路半在蒼烟落葉堆

嶰谷以棲霞僧所送木瓜見贈

昨日繖山山有信秋黃新摘滿林烟氣含酸味偏

宜客形借癯名合近禪一種苞苴足幽事十分熏

習伴無眠裁詩爲憶明居士更擬抽帆上寺前

九日半槎招集行菴以仇英畫淵明像爲

供分得歸字

天公惜重九昨雨今朝暉出郭有成約小築傍禪

扉蘭闥一彈指密林翠四圍刁調無罷風將作焜

黃飛撫時共清歡几榻含幽微慨然想陶公妙畫

猶依稀如詩枯而腴相者空舉肥采菊薦一卮願

爲公白衣俯仰千載下人事多纏徽此中有真意
非公誰與歸

同授衣廉風游建隆寺用沈傳師游道林

嶽麓寺韻

在揚州城北宋太祖征李重進駐蹕於此敕建爲寺

淮南訪古難盡論出郭坦迤馬可奔忽聞寺擅大

宋號一林黃葉開祇園當時李氏此重鎮雕青天

子宅相尊病龍上升帝命改戰功猶憶超何樊

樊愛

龍何

比肩事主趙檢點肯爲泥首延朝昏親征致

煩黃屋駕禪枝更閱七萃屯殘碑臥地字暗摸顏

垣掘斷無三門山僧去後佛火滅餘憤夜照荒燐

痕歐史不書韓瞠眼議論誰復能歸根圭齋別立

三臣傳大快人意醕滿樽房陵半仗瞥眼見陳橋

一詔隨風翻圓通寮中袒背字重圍何術能騰軒

贊甯續傳載云開寶末江州圓通寺旦過寮中有
客僧將寂滅袒背以示其徒有雕青李重進三字
莫言幻境等空寂綱常足以扶黎元

樊榭山房續集卷三

樊榭山房續集卷第四

錢唐 厲 鶚 太鴻

詩丁

同方西疇閔玉井陸渟川自紗帽洲江行
至青山作

萬頃琉璃一色鋪天教晴意上殘蘆乾坤雙眼人
將老風景千年世不殊建業水從全楚下佛狸祠
近暮山孤明朝期我蕭齊寺還有金焦腳力無子
庚戌晚秋游京口三山已十四年矣

泊龍潭聯句

渡江已一舍

鶚

入港逢三叉樹隱塔突兀

玉井

帆

轉山谿訝鷺影過秋水

鶚

雞聲隔蘆花斜陽半峯

色

華

小泊依人家

鶚

宿攝山渡

沿流望繖山亭亭行艫首疎雲翳其巔零落古渡口清月出復翳風燈照衰柳平生江乘夢三歎未曾有人語潮生時雞鳴霜落否輾轉候天明披烟偕勝耦

游攝山棲霞寺留止三宿得詩三首

諸峯圍圓天青蒼不容罅廣塗入香門正殿儼雲架有懷明徵君高躅久代謝山靈收積雨松風本無價東嶺鳥道通一一嵌精舍澗泉杖底鳴苔龕石面亞遐哉齊帝子佛事壯堪詫維時秋冬交黃葉滿衣下似曾識前生肯負雙不借

初爲棲霞宿孤月似留客裴回出東峯已覺林際白共坐疎松陰滿地橫畫格山深風早寒諸天去

咫尺倚杖聞微鐘瘦影寫巖石默數清境最迴與
下界隔長嘯援鳥驚今夕是何夕

朝光蔽深竹陰生西谷西細路僅一線旁有百尺
谿岌岌石相倚其色蒼而黧歲晏水脈斷不見下
飲霓高巖蘚蝕字漫滅二徐題誰爲噉名者更鑿
青雲梯取道中峯半俯視衆岫低峯腋松雨來江
光忽淒迷詎敢惜霑溼明晦態不齊策勛木上座
絕險相提攜

攝山雜詠十二首

明徵君碑

唐高宗御撰相王府
侍書高正臣奉敕書

居士八辭徵異代動帝王侍書筆有神磊落載天
章商略拓翠墨用實歸時裝

舍利塢

隋文遺浮圖石函瘞雲嶠下鐫佛涅槃繪事顧陸
肖奈何完顏軍缺落付劫燒

品外泉

引杖試靈源暗覓通積霤仰出石蓮花珍池似阿
耨我來爲品題清寒不可漱

千佛嶺

偃松列如幢層累得殊勝二分趾外垂偃樓上危
磴初日照金容高下眩難定

翠微菴

霜風放嚴晴墮葉雨無極隔籬禮磬聲不改翠微
色揖客登僧樓轉覺嵐陰逼

中峯澗

蔓壑一枝水遠自中峯吐隔竹鳴佩環絕憶柳州

語僧房靜夜聞月來風起處

試茶亭

言尋白乳泉臯盧未攜至不見試茶亭空留試茶
字猶勝徐十郎山前設茶肆

般若臺

精廬黃葉中閒以修筠裹般若本非臺蒲團銷七
箇乞我佛前燈中宵吉祥臥

天開巖

絕徑上厓屢剗削無堅頑一櫺橫寫下南宗著色
山高空指飛鳥遠自蔣陵還

白鹿泉

泉上有明李言恭篆書三字

澄泓浸山腹天影露半珪傳聞初開日雪色飲伊
尼誰知臨淮侯興興與桑苧齊

靳尚祠

楚臣佩蓁施林表曾現形自受度師戒不食江魚
腥我非離憂客坦步半山亭

白雲菴

林深老屋斜日落山風大一僧拾橡歸延客聽虛
籟爲憶曾游人迢迢白雲外

謂嶠谷半查兩君

留別棲霞寺久林禪師

幽尋不惜路岐遙冷淡家風久寂寥洞上禪燈今
再續山中浴鼓早相招髮分艾色知同歲手指松
根話六朝別後茫茫隔烟水寄書何處附歸樵

師與

予同壬申生

次韻樊榭居士山中留別

釋界清

久林

白雲紅葉隔城遙日掩禪關臥寂寥苔逕偶因

高士埽幽人不待野僧招
欣登峻嶺參千佛
笑看蒼松問六朝
此去金陵多勝蹟
新詩惠我寄山樵

自棲霞至金陵道中有梁始興王憺安成
王秀吳平忠侯景墓石麒麟墓碑猶存蔣
王廟在鍾山之麓太平門外城下卽後湖
也得四絕句

巢烏送客又飛還
霜樹參差古路閒
偷得定林詩裏景
蹇驢滿意看鍾山

梁朝遺跡未銷磨
運去王侯可若何
突兀田閒牛礪角
閱人誰似石麟多

顰顰吟鞍拜蔣王
雲旗髣髴護重岡
不教廟額仍稱帝
豈爲流聞望子香

薄日殘雲黯欲晡
避人漁艇占枯蒲
城根斷續明流水
不問心知是後湖

登清涼寺

寺爲李後主避暑宮

石城山上寺云是李王宮
路折三休至江橫萬里通
吳帆如鳥白楚樹入雲紅
竟日同吟眺秋衣不耐風

秦淮懷古四首

佳麗江山入暮秋
秦淮從古擅風流
殘陽半隔烏衣巷
綠水斜通白鷺洲
事去興平空拜爵
天亡歸命不成侯
當年大有傷時語
一曲清歌在漏舟
回首中原接戰塵
但誇天塹渡無因
阿誰肯墮新亭淚
有客猶尋舊院春
會冠蓮臺王學士
名喧桃葉顧夫人
蛾眉前後皆奇絕
莫怪羣公欠致身

南都近事鬪妍華北里妝成勝若耶妙妓新羣吟
蛺蝶君王特敕問蝦蟆匆匆時節爭鉤黨草草兵
戈散內家贏得渡頭殘柳在瘦腰無力倚風斜
女牆東畔足流連只少劉郎好句傳長板橋空餘
舊月回光寺古賸寒烟荒畦盡種瓢兒菜樂府新
停燕子箋聞道樵童閑換酒井中淘得墜金鉏

宿長干寺僧房

閑房晏坐處幽絕到何曾小瓠因耽靜清談嬾對
僧香焚石上月墦禮樹閒燈此地秋堪餞吟成秋
卷棱

歸舟江行望燕子磯作

石勢渾如掠水飛漁罾絕壁挂清暉俯江亭上何
人坐看我扁舟望翠微

洪熙古刺水歌同全謝山作

銅罐上刻云洪熙元年熬

造古刺水一罐淨重八兩罐重三觔

哀牢九隆漢所開唐代六詔爭喧逐玉斧畫河段

氏立阿禮殉節梁王摧濠梁真人設郡縣炎徼西

南俱革面分司古刺始羈縻

永樂四年大古刺土

宣慰司又立小

貢琛莽怕旋來見

洪熙元年底馬撒宣慰司署古

刺司妹婿跌

取寶船回恤遠夷萬方輻輳仁宗時

此香不減芬陀味此水應超蘇合池甲煎百和花

盈缶六一泥封篝火後斑衣染麝鑱耳酋珠絡挈

蜚馬郎婦熬成細字鐫青銅進入春風生六宮一

灑羅衣長不滅氤氲願與君恩終可憐債帥如香

尉購得朱門媚權貴分宜遺臭塞兩儀當時壓倒

龍涎氣

籍沒嚴氏有洪熙宣德古刺水十三罐

枕頂餘芳世廟修御

衣小炷純皇留南都譜記春橋顧勛戚方傳恭順
侯華胥舊事無人識流落江南并江北金仙鉛淚
一函中夢破香銷彈不得

浮山禹廟觀山海經塑像三十韻

淮海皆平壤隆然片石支中央居混沌明德鎮阼
危不共羅山合還同息壤遺媼神唐日觀江水漢
家祠永永尊文命湯湯罷怨咨徽形猶帶瘦高棟
反如卑柏翳承虛寢狂章侍玉墀風雲生恍惚土
木出恢奇憶昔鴻荒遠寧安婦子熙神姦渾不辨
人獸互相欺枯步窮乾奧方祇駭地維蛇操何蚘
繆鼃抃更躩踞林出刑天舞巖藏貳負尸應龍飛
有翼精衛溺堪悲博物推中壘傳芭望少姨兒坪
終古詫母石至今垂經可百蟲證功堪四載追解

裳嗤適裸鑄鼎訝逢魑定括河圖象徒聞太史疑
規摹非近事指點立多時六月當初降千村走禱
祈笙鏞應閒作巫覡尙謳思瓜蔓前年決魚頭萬
室爲空紆謁者策屢費大農資呵壁吾將問拳茭
且補痍牙鬚雄此輩秘怪孰攸司落照明低塔寒
飈響女陴惠之前有塑靖節後無詩沃野居難卜
丹止到未遲如聽赤絛使歷歷話幽姿

集方環山齋題明寧獻王畫

寒齋延明曦壁訝數峯接其下松檜陰鬪水穿石
摺巖扉中有人停琴展幽牒侍立雙玉童衫袖空
翠裏我疑盧鴻一期仙磴可躡諦觀出寧藩珍重
墨林笈高皇十七子龍種何蹠蹠晚年慕冲舉
抑金川捷倖非七國敗思與八公揖此圖寓意取

深蘿神隱愜渾如匡廬雲尚裊草堂頗太息南昌
城空宮填落葉

金陵移梅歌爲嶰谷半查賦

小玲瓏山館隙地高高下下多種梅主人性癖愛
奇古更令遠訪江之隈蔣陵氣暖首靈谷花匠家
多住鳳臺根蟠數世仍護發萼點十月先含胚殷
勤揀取六七本乘濤東下將春回江神豈是妬花
者魚龍鼓鬣揚其頰封姨拗怒得無恙園丁上番
工移栽南枝記取解束縛凡卉見之皆輿僮清泉
百道足生意微陽潛伏扶新菱西疇居士稱好事
行廚招客銜深杯酒闌客起寒月上疎影一一堪
疑猜挨石鬚鬢鎖水怪循牆屈曲藏凍虺預想他
時雪滿眼彷彿此際香橫苔不須健步煩杜老芳

心更用狂吟催

冬日同人游廣陵北郊作

出郭少塵事短晷殊清嘉輕冰犯孤艇敗柳何鬢
髭捨之度蜀岡一徑縈修蛇環溪有小築宛似甫
里家不放能言鴨但種凌風花新春飽香稻餘力
窮幽遐偕行陶謝手畫意看盤車人影殘陽裏輶
輶誰能遮紆回堡城曲高下新塘窪往者李鐵槍
於此紛攫拏臨安運未畢紅襖歸泥沙晚入鐵佛
寺竹間見餘霞老僧指廢殿猶以楊吳誇英雄三
十六寂莫盤昏鴉何況墟墓間陳人去如麻茫茫
識誰氏既朽同浮苴吾儕稱達者野飲興倍加吟
作隨意詩醉墨風中斜

十一月十三日廣陵紀事戲答諸同人作

二首

豈是風懷尚未衰鬢絲禪榻已心灰恐教人種年

來失又遣香車客裏催名士肯分閑館貯謂解谷半查

詞流許借聘錢來謂恬齋西疇南圻漁川居然添得詩家事

不比金釵二十枚用南史周盤龍事

廿年書劍兩無成贏得江淮作達名盛德何傷笑

安石閑情不礙賦淵明占香夢驗消寒夜爲客心

酬舊雨聲歸到故園春正早玉梅花暎綺窗橫緯略

引夢書云夢得香物婦人歸也

邗溝廟

邗溟一道到江迴遺構何年亦壯哉越國已將藏

甲賀晉人曾見好冠來祭餘稻蟹猶風俗夢斷梧

桐有劫灰枕堞早知從直諫中原牛耳得追陪

題汪旭瞻蘆溪書隱圖

甲以下

汪子有書癖長懷萬古情與人殊嗜好無地著功名老屋碧蘆繞故溪春水平青燈耿遙夜鄉夢畫中生

試燈前一日同人集趙谷林小山堂觀流求國官工松元泰新刻墨譜用山谷松扇韻

疎梅刺簷蠡撲紙瀲灩春杯歲相似酒半娛賓更絕奇一帙歡斯副墨子佛帳煤新翠餅寒是中望若三神山我疑徐市逸書本只在東溟支島間

去日本甚近故用歐公日本刀詩意

流求

元夕雨中集吳敦復餅花齋分得何字

佳節怱怱僂指過故人有約共婆娑杯中酒勸迂

辛似席上詩如小庾何唐人有上元夜效小庾體詩聽雨簾櫳
燈影颭衝泥巷陌屐聲多翻思舊日經行處看徧
交枝萬眼羅

首春連雨兼旬借閱谷林新購宋槧僧智
圓閑居編用前韻

緊薄無痕知宋紙高人獲之球壁似開槭處處見
西湖瑪瑙院僧中庸子閑泉幽徑蹟荒寒湖波依
舊繞孤山春來懊惱連天雨開落梅花溼翠閒

初晴曉行湖上

一年難得是春晴落盡梅花始出城半白烟橫山
淡冶初黃柳照水空明自披絮帽寒猶峭纔上籃
輿趣便生底事不教浮艇去尋僧又過亂泉行

春夜訪巨公于雲林宿面壁軒

昨與林僧有夙期明燈定板話移時重修靈隱千
年志更續西湖八社詩鐘學龍吟春礪響松和猿
梵夜堂知漸看海色梅梢上消受輕寒拜本師明嘉靖閒西湖有詩社八曰紫陽社曰湖心社曰玉岑社曰玉崑社曰南屏社曰紫雲社曰洞霄社曰飛來社曰友祝九山時泰高賴湖應冕王十岳寅劉望湖子伯方十洲九敘童南衡漢臣沈青門仕分之主

二月三日同少穆竹田諸君集湖上題酒樓壁

湖上羣山列畫屏探芳齊上上船亭春光更比去年早詩鬢不如前日青正滿水應爭淡蕩未開花似惜飄零魚羹宋嫂猶遺俗何事尊中限醉醒

次韻堇浦春日書懷四首

里社追游每拍肩投簪又是入新年移家幸有琴

書共卜築欣看樹石連不守庚申緣道在偶占甲
子得春偏始知上界多官府今向人閒見斥仙
六街堀堞夢纔醒草色何妨滿戶庭洛下憶曾修
禊事淹中悵未了遺經當簾山月鈎簾見傍枕春
潮轉枕聽此是城南招隱處新詩暇日上重屏
獨坐杉亭簇絳趺看花折簡不煩呼從無長物稱
名士雅有閑情屬固姑酒畔俳諧編作集墓堂文
字積成逋與君共喜慈顏奉未敢人前號老夫

端居風物際昇平不覺吳霜點鬢生上冢年光潛
委巷趁朝清夢入嚴城噉齏元是儒林味焚草無
勞後世名有約出郊真興劇柳花如雪愛初晴

二月十四夜同周少穆胡又乾施竹田吳
敦復汪旭瞻施北亭西湖汎月共賦四絕

句

滿湖雲水溼如灰直爲桃花冒雨來已拚尋僧寺
中宿峭寒忽見晚陰開

湖上鳴鼃盡屬官青紅亭館亞層巒東風也似撩
詩思柳外吹來月一丸

水靜初鎔百頃銀游船歸盡閉重闌莫辭蘸甲十
分飲月地花天只七人

月下看花不肯紅沿隄花影壓孤篷春烟夜半生
波面髣髴青山似夢中

曉行蘇隄作二首

乍披衣起曉鴉前月落春空柳暎船半醉半醒行
樂客不晴不雨養花天堯時甲子今重見唐世清
明此尙傳偷得湖邊成信宿向人誇道是頑仙

破曉招尋不待呼山烟水霧斂還無樓頭柳眼如
窺宋隄上花枝總姓蘇價重十千春易買才高八
斗景難摹惠崇小有丹青手肯爲佳游寫作圖

聖因

寺大恆長老爲
作春湖月汎圖

吳山賣卜行爲許初觀作

吳山新雨道少人石龜巷古無風塵開簾忽與許
子遇白鬚蕭颯談齷齪許子才筆清而醇五經紛
綸并大春屢干春卿不得進馬磨豈療文休貧去
年束裝爲客游一言不合東諸侯著書自比習鑿
齒賣卜定齊顏惡頭我聞四千九十有六卦孤虛
飛伏分成敗何妨俗子握粟求自見名流攝衣拜
入戶空占銜筆蛇夜深背癢無人爬老夫如應枯
楊象不羨長安擇壻車

時初觀有再娶
意因以戲之

陳居中蠻王入貢圖

開緘絹素凝烟霜筆跡纖妙窮豪芒七國人物在
右方嘉泰待詔蕃馬長丹正博士官天章八分題
識俗頗詳顧瑛私印謹所藏職貢一一來梯航嬋
媛四騎君袂良非畀彌呼名女王侍兒手捧沈水
香鑑井而孕何荒唐持衰渡海不得望真臘風土
文豹將蠻奴對舁乘阮囊前道獵獵旗飛揚占城
淳泥耳垂璫錦罽包裹百寶箱負箱峨峨狉狉裝
扇飾髦髦隨侍旁臣髮髻鬚獻西洋象齒如雪闍
婆鄉三佛齊致兩驢驕一匹頓塵一騰驤此皆鬻
髮深目眊向化慕義恭趨蹌復有釋子偕雁行得
非奮然與頡頏九譯之及古越裳宋德如日出扶
桑願難任人無怠荒畫史再拜陳明堂

次韻答竹田雨中見寄

一春常貰酒家錢尋壑經丘到處便閑病只憑花
著莫清愁每共雨連縣平生自信無媒徑世事從
他上水船屈指故園櫻筍會與君行樂又今年

蘇文忠公雪浪石盆銘拓本向見於馬君

嶰谷齋中曾和公雪浪石詩韻今年春曲
陽孫明府以一通遠寄復用前韻賦一篇

奇章聚石甲乙屯嗜好未若滎陽尊蘇公豈與二
子類往往手剔苔花昏定州雪浪亦何有官齋岑
寂如山村黑質白脈獻瑰狀彷彿國士登公門天
風吹公落南海誰持此石爲招魂浮休居士張舜民
繼公後力搜故物頽垣根玉井芙蓉盡牽復銘字
爭看屋漏痕莊事見墨錄我居東南夢西北喜得墨本

珍微宋版印
堪重論機泉飄灑今已矣想見白帝朝翻盆故人
惠我意不淺一紙奚啻千金存

覺範畫梅爲敬身作

古來畫梅誰最好僧中獨數花光老花光衣鉢付
何人石門釋子得其真曾聞花光能畫影墨暈寒
苞偏耐冷石門畫梅兼畫月比校烘雲尤幻絕只
圈花瓣不安鬚看去朧朧月如潑畫月之外更畫
烟烟籠玉質難爲傳斜枝一抹忽中斷似倚孤山
向晚船流落南屏定幾時君今幸得收藏之寫作
春風十分態舉似湘西瘦阿師箇是浪子無聲詩
過張聚五齋觀王叔明爲陶九成作南村

圖次卷中全思誠韻

陶公至正末養素棲田園自號小栗里曠然

樊文敏之外孫畫蹟可晤言簷端機山秀籬下谷
水源著書自抱甕爲農常叩盆修修疎竹裏欲往
造其門

倪穉疇給諫庚申夏日在京師曾作城東
訪友圖并系以二絕句寄金江聲副使於
上谷蓋追寫丙申春同訪余不值事也江
聲亦題二絕句裝潢成冊穉疇癸亥奉使
江南歿於太和今春江聲歸里始得見之
感歎不足如數題後

存歿人閒感有餘黃門詩畫最清疎長貧孺子今
猶是當日偏多長者車

流光勿勿去難回訪友圖成事可哀水竹城東無
恙在喜君頭白早歸來

原作

杭州

倪國璉

子珍

枳籬門逕菜花初最愛城東水竹居人立板橋
吟興遠隔林何處響繅車
詩人高隱斷幽蹊菜圃三叉路欲迷看竹平生
緣不淺叩門隨處踏春泥

又

金志章

桑村藕蕩接城隈亂竹遮門晝不開一曲板橋
烟水隔緩尋芳草更裴回
十年卻埽謝公車卜築城東稱隱居知與俗人
行跡斷菜花香裏自抄書

春盡日小園木香薔薇盛開時予將有廣
陵之行

老逢花信頗流連紅素春餘特放妍一桁重陰如

愛護千枝柔蔓太狂顛郁然舶上香山子奇絕宮
中錦洞天明日扁舟吳苑路晚風猶爲舞僂僂

陸南圻招同人集行菴分詠廣陵古蹟得

秋聲館

鐵牛入宋初陶穀小字鐵牛頭銜祇翰苑奉使下南天蘆

碧汀洲晚水村何人居風葉梢梢偃聲翻六月秋

江吞萬里遠榜題亦雅士竟與漁兄混奈何諭強

藩不盡王臣蹇情昵社娘歌任社娘傳見沈遠雲巢編語隱公

廚飯金鑾否人在穀自號金鑾否人空畫葫蘆本不如此

棲遲賓鴻識肥遯

五月二日嶰谷半槎招同人集小玲瓏山

館題五毒圖

壁上鉤搖長尾蠹服虔通俗文蠹長尾曰蠹守宮善緣供一噉

珍傲宋版印

之二蟲者豈睚眦以氣相制理莫解爬沙腳手鈍
不快蟠腹睥目觀成敗漫上青冥作妖怪空使臣
全下階拜其旁甘帶有卽且蚊雖似汝齧不如韞
人須皮待汝屠嶺表錄異蜈蚣大者皮可鞣鼓戾蟲耽耽中央居
風林夜嘯百獸祛乃與羣小爲相於得非以人充
餌歟是名五毒圖畫俱命儔連類陰生初疎簾高
館無沮洳象形隨俗當袂除演雅聊爾同軒渠

五月十四夜紅橋王氏園看月同玉井梅

泂南圻作

王家樓子不多寬五月添衣怯晚寒樹底明蟾樹
頭雨酒人泥殺曲闌干

同作

江都

陸鍾輝

淳川

攜得清尊上小舟滿園梅子雨初收月斜人醉

不歸去白紵涼生水面秋

送施槃齋之官餘姚二首

愚山先生曾孫

江城初識面又送片帆過漢縣圖經古姚墟山水
多裝輕知砥節名重異催科好與蠻荒政同賡里
俗歌

君前宰電白以循吏薦

籍甚高賢後稱詩有典型清新嫻格調孤峭萃英
靈行幘穿時雨專祠拜客星東游應踐約準擬續
蘭亭

元至正庚子春劉仁本集題越之士四十人於餘姚秘圖湖北作續蘭亭會詩

顧丈月田招同人南屏讓師房避暑分得
葉字

僧房有嘉招銷夏幽事愜一艇溯空明風漪平帖
帖宿雲曉未收湖南秋已浹入港低水花穿林響
露葉驕陽似避人經樓曠可躡斷塔兀當窗連山

遠於堞徑轉巖陰侵堂開泉氣攝休公苦愛客蔬
果紛稠疊瘦倣島可詩澹續宗劉業何當爲後游
更步松閒屨

周少穆招同人游瑪瑙寺訪後僕夫泉分
得無字

何計足銷暑幽泉時所須同詣北山寺況有方袍
俱搖兀盪雲水蕭瑟鳴菱蘆入門氣象古松徑臨
平湖芳公遺甃在寒碧窺牆隅當年續前哲用敢
告僕夫雖非孤山舊法乳應不殊至今四百載充
滿於僧廚日汲忘其名流俗良可吁主人尙敬客
一斗爲我酌烹珠兼鍊雪頓使渴吻蘇惜哉張貞
居小碣今已無淒然想清音難覓石上枯芳洲琴名我
亦山中人行當斲甘腴楊家買阿對杜老喚獠奴

此策成有日不假調水符一笑且置之相與追詩
逋

初秋雨中汎湖

湖上經旬兩度過亂雲陡頓暗高荷北峯半沒南
峯出日腳斜明雨腳多豈有吳兒愁盪槳漫從漁
父聽鳴蓑誰臨潑墨屏風樣坐看秋風起白波

清溪歎

七月三日天沈沈海風吹作三日霖黟山妖蛟最
得意夜拔潭穴漂嶽崙水來青溪十丈許鼓怒直
使胥濤瘖胥濤氣短退三舍人如白蘋蔽江下屋
材家具滿江汊嗚呼青溪之人何辜於蒼穹人人
盡在秋夢中不知魂游龍伯宮

中秋日陸芸軒招同人游南屏觀米南宮

摩崖琴臺字分韻

南山秋爭高彌望翠屏展陸子柘湖來招尋興不
淺入林導白足幽徑逾偃蹇斗折攀壽藤仄行仆
積蘚逶迤穿風穴潭島凡幾轉湖光似明蟾屈曲
浸蒼巘舉俗重宵游我輩及晝衍側聞米漫士題
字剔蝸篆琴臺爲誰書健筆猶可辨清音自有餘
佳名非枉踐古人去已遙得酒聊共遣

贈茅湘客七十時寓湖上昭慶寺

秋賦同時幾輩存茅君元是列仙昆百年遺事鍾

山獻一卷新詩白下門

時以金陵游草見貽中多
述尊從高祖止生先生事

先生姬人楊宛有
詩集名鍾山獻

壽骨自臨湖水照閑愁不傍佛

燈昏相逢初地無塵事應覺清言勝酒尊

秋晚自臯亭至臨平二首

不減看山興
吾行及杪秋
斜陽半郭外
晴翠滿船頭
林晚開黃葉
波明見白鷗
前峯烟際寺
歷歷記曾游

將近臨平道
臨平暝色連
遠風燈照牽去聲微月斲
鳴船山憶丘
丹隱泉題玉
局仙不知松
子落誰詠夜
涼天

過硤石登西山廣福院三首

魚麇菱市鬧
秋深山似蛾
眉俯碧潯
我是杭民重
遺愛舍人行
處一登臨
西山曰紫微以白公登此故名公嘗云杭民呼余爲

白舍人

千畦穰稴望中收
海日初生爽氣浮
二十六年彈指過
白頭纔得倚僧樓

顧逋翁有讀書臺
白塔青林相對開
佳處不教容

易盡東山留待後游來

月夜渡石湖

斗柄倒插吳江濱三萬頃外秋無垠楞伽山影混
空碧胥口月光流水銀十幅帆從天上渡一星火
識蘆中人世閒嚳夢那得到寒塘露下添衣頻

朱澤州鹿田招同人游寶奎寺分韻

寺爲宋相

喬行簡捨宅有理
宗摩崖見滄二字

招攜惜短晷吟興近山發斜照巷中巷深感幽人

歿

昔吳丈志上每入城必寓此寺有句云
幽人深住巷中巷好鳥遠歸山外山

茲來盛

朋游登高見城闕鱗鱗遠峯際江影露一髮見滄
閣不存崖石尙突兀閑尋穆陵書黃葉徑凹凸僧
龕文惠像練達具風骨褒中秉魚須便殿曾備忽
如聞三京收深論八陵謁樹國先治內陛下莫倉

卒胡爲復讎舉竟使南渡蹶無兒似香山捨宅作
禪窟斯人真曠懷華屋已銷歇裴回久言旋霜空
摩健鶻

新安吳長公與予有卜鄰之約將以明春
攜家武林索贈四首用舊韻

一區河曲地還餘同巷初欣有定居自比晏嬰知
近市非關王播羨臨渠名泉秀嶂兼幽躅時長公寓家錫
山落葉高窗似故廬爲說西湖好烟景長竿移得

昉溪漁

豪華不慕柘枝顛脫卻朝衫便是仙求友寒尋烟
外驛攜家春上渡頭船擬刪碧草通新徑待構高
齋署小眠我亦年來愛幽隱買山未辦道林錢
入春風色最天斜摒擋琴書頗足誇帶蘚旋移天

竺石和泥須買馬塍花每聽通德閑中話相伴清
娛到處家只此淨名方丈室翛然已遠輭塵譁

殘年猶遣報章聞酒國詩壇卽舊勳水竹遮村無

萬數雞豚結社再三云菟羅更續城東記

予舊有城東雜

卷記三

討論應添硯北羣他日灌園徵軼事兩苗烟

甲幾家分

除夕雪中讀唐撫言四首

白衣濫竄惜溫岐五十成名未是遲何事少師戎
幕客居然兩箇阿孩兒

貴人莫怪事多忘索婦留官也不妨記得泠然書
內語賣漿今又值天涼

裴頭黃尾姓名殊怱悵長風過宋都寄語詞人休
自許花鈿曾及半妝無

年年今夕倍情親
喫果看書翦燭頻
一事差羸隨計者
雪中不作鬻驢人

樊榭山房續集卷四

樊榭山房續集卷第五

錢唐 厲 鶚 太鴻

詩戊

正月四日雪霽遊天竺寺歸訪巨公於靈隱寺出觀宋天聖四年免賜田稅牒至晡

並湖而還得詩三首

乙丑下

大雪回春姿奇寒故宿留駕言遵湖濬參差縞衆
皴初陽一照曜飛光滿崑岫松門限西南咽咽幽
澗漱禪棲冰霽懸卵塔竹陰覆窅然泯垢淨瑩若
增深秀焚香禮普門合沓羣峯湊眼中銀色界可
覲不可究

林巒削玉轉兩澗束一橋此中雪逾深午景停虛
礪飢鳥啄凍石迴颿撼封條泉影鑒更白崖溜垂

未消自非能寒人難逐猿父跳主僧方外契茶話
相招要示我免稅牒重是全盛朝何如署曰貞押
字集羣僚牒有王曾薛奎陳堯佐呂夷簡押字蹟存人已往不異空
花飄遲遲出山路覓酒同歸樵

山村九里行融沍趾交錯松閒見積霏皎然若棲
鶴湖平碧流淨延眺清嘒嘒回首所歷境冷色晦
烟壑斜日半南山璀璨數樓閣近城氣猶凝向晚
風大作微吟平肩輿尙恨衣裘薄

元夕吳敦復招同人集瓶花齋分韻

寒氣猶遲屋角梅快晴似此亦佳哉童心忽覺燈

前在客興多從月下來舊雨沈沈思剪韭憶去年元夕雨

中之集新詩藹藹續傳杯看街簾外天如水歸去誰

家笑語催

汪西顥招集湖舫分賦

此日春寒撲面濃柳絲猶未試丰茸鷗鳧不動偃
前浦烟雪相和畫數峯久別詩成新雅集乍來船
問舊游蹤郭家車子斜陽外似惜芳菲特地逢

河渚探梅同南漪旭瞻蒔庭笠人作五首
千斤池

遙指秦亭翠舟輕縱所如風流非踏土浩蕩想觀
魚芳草生遺廟寒梅笑廢墟侯芭能載酒幽興未
全疎

宿蘆菴

投止蘆中宿前山澹夕陰春風花渚響夜火佛堂
深飢獺窺禪定驚鳥助客吟何人偏早起牀下有
拏音

同作

仁和

許

松

蔣庭

舟到交蘆舍春禽送夕陽青山當佛座流水繞
禪房籬外叢篁密庭前綠萼蒼夜來風過處幽
夢帶寒香

曉過曲水菴

水北與花南精廬近可探漁舟出清旭鄰磬接空
潭壞榜猶存字晴山漸有嵐簷梅亞紅雪幸得供
瞿曇

同作

許

松

鳥噪披衣起幽期次第尋低頭穿竹徑清話叩
香林梅古簷前亞山明屋角侵開扉尤可羨曲
水滌塵心

同作

歙縣

汪還仁

笠人

侵晨尋梵放隔竹啓僧扉岸曲溪痕見林疎山
氣微茶香來坐具梅影上行衣漫作重遊計高
閑不擬歸

秋雪菴贈與耆上人

老僧年八十自小住汀州與客談秋水開窗照白
頭五年花事改四壁蘚痕留太息南湖廢空門亦
隱憂

同作

歙縣

汪日煥

旭瞻

偶繫春風艇難尋秋雪詩千峯遙供養一衲古
鬚眉野竹遮橫約疎花出短籬客來閑指點空
闊鷺飛時

月夜汎舟至西溪山莊

溪流凡幾曲曲曲月隨船別浦春寒淺名園夜色

偏鳥驚千樹雪人語數峯烟不待參橫後臨行一
惘然

西湖采蓴曲

湖波春深碧於苔游魚布影三潭隈三潭倒浸三
塔小中有蓴根不用栽蓴根歷亂蓴絲滑半捲
荷縈石髮曉光蕩漾膩山烟夜色微茫寫水月大
姑采采瓜皮舟小姑盪漿歌中流指纖爲怕龍涎
失腕弱尤憐雉尾柔春風采蓴蓴正好秋風采蓴
蓴已老願如蓴好繫郎思歸來同拜水仙祠

三月六日顧丈月田招同人鳳皇山看桃
花至包家山分韻二首

乳鳳不飛去日斜林翠高山行誇勃窣野飲鬪清
豪社火明神樹宮花冷佛袍今年少風雨春事屬

吾曹

三一菴重過江天望最佳竹疎搖客夢泉冷入幽
懷紅雨尋歸路青山著小齋他年團社約應不負
吳鞵

錢舜舉摹周昉內人雙陸圖爲梁設林作
深宮晏起花陰午尙覺春寒入眉嫵只將握槊當
嬉游不亂窗前白鸚鵡兩人對局如有思寶釵半
墮雲鬟敲旁觀一人凭小婢骰子欲下春蔥遲蠻
韉踏地紅鵠觜金餅力挽薔薇水女官未敢促朝
妝宿粉殘黃憶濃睡睡濃曾夢雙陸輸唐家社稷
須人扶柘袍又出點籌手樂事可憐同婦姑畫師
著眼非窮相曲眉豐頰當時尙錢郎摹古能逼真
寫出徒令意怊悵豈知絕代佳人住茅屋寒機軋

軋無膏沐

晚春閑居二首

人閑如有待春晚尙餘芳
細路通鄰塹長天覆女
牆青梅閒青杏垂柳復垂楊
坐釣行吟外渾疑與
世忘

寂寂柴荆掩幽偏似我私
抱疴忻白髮習嬾負清
時迸筍從穿砌狂花漫出籬
一春書不讀園小日
來窺

舟泊毘陵同吳長公游青山莊四首

入門先見水宛似在濠梁
林影橫烟艇流文照畫
廊清華從此始崩剝勢難忘
客路偏佳境尤宜勝
侶將

縱步平橋上空涼得最多
俯窺開弱藻交語出喬

柯尚記橫塘夢如聞子夜歌何當逢急雨來看鮑
新荷

升降疑無極岡巒望更寬頽陽一枝塔飛翠幾層
闌樹杪吳天盡窗中春事殘米囊花滿眼應是勸
加餐

前朝邱壑擅人說兩愚公

錫山鄒彥吉爲園名愚公谷此莊初主吳服于

亦號愚公

物力爲山盡經營易主同客歸書閣閉鳥下

石枰空游興兼離緒分襟向晚風

次韻同作

歙縣

吳震生

長公

毘陵共游眺遺事滿齊梁只少山環郭誰家樹
繞廊愛他園內景令我意難忘榜戶招詩侶杯

鐺且莫將

主人榜門有詩酒可共語

神仙疑有宅富貴得爲多碧水延長阜紅樓隱

古柯金張天上族弦管月中歌行樂宜邱壑朝
衣早翦荷

昔者東牀重延陵俛仰寬烟雲邀對酒花月入
憑闌紫玉空留主香魂悅未殘若知人代感冷
食亦愁餐

莊故主吳氏宜興相婦翁也吳又有季女死于此時時形見雖屢易姓皆

祠其木主云

勝境遭鴻筆千秋幾鉅公不隨陵谷變莫謂雪
泥同塲廟涼陰集亭橋夕照空菟裘那得此惆
悵一臨風

海烈婦祠迎送神曲二首

撫湘瑟薦江蘼靈望夫其來遲夫愚弱疑可餌矢
從夫靡有貳夫來遲逢猶狂紉上服連下裳繫朱
絲猶在領號于帝已得請乘白鳳游清都下鑒觀

芬椒塗靈安坐士女愉

酌明水靈少留靈懷土我心憂逐雲龍無處所懸
水村靈迺下乘桂舟西蠡河靈不留涕滂沱

葉物齋雅集賦一字至七字詩分得禪

禪無住忘筌隨靜坐得安眠不離文字已滿中邊
話墮霑泥絮心空透水蓮世出世間超絕想非想
處悠然何須更乞雲山衲釧動花飛結淨緣

馬嶰谷半槎招集行菴食筍限筍字

我生吳越鄉連山富簠簋前身天目僧托命惟在

筍

宋僧贊寧筍謂載天目僧詩云我本無根株只將筍爲命

每從破凍初一洗

几案窘胸中淩雲氣欲吐謝不敏孤帆卸淮甸清
樾表春盡故人有嘉約斜徑竹香引軒窗愛疎豁
新境拓畦畛供客用意勤籜龍屠最忍頗疑匡廬

游甜苦未可哂物以少爲貴食經侈堪憫捫腹又
詩成茶聲鼎鳴蚓

覓句廊晚步二首

近日幽尋屢出郊
謁來山館燕新巢
斜陽一抹風廊影
葵寫圓花竹寫梢

返照深深入竹根
青鞋踏徧舊苔痕
好詩只在微茫裏
付與棲禽自在喧

程洴江編修招集篠園水亭分韻

虛亭俯烟渚客到眼初明
沙柳侵天影風蒲學水聲
醉宜搖櫂去詩向倚闌成
地主饒幽興流連待月生

題嶰谷半槎南莊七首

青畬書屋

平遠眺林垞，朶仁繞江水。人云讀書聲，時出豆田裏。

卸帆樓

空樓晴亦雨，桐竹風披薄。飛來北固雲，帆影窗中落。

庚辛檻

水氣入虛櫺，幽澹心自領。魚行無所依，旁穿高柳影。

春江梅信

我來過花時，紙閣綠陰碎。驚鳥蹴梅丸，忽墮小山背。

君子林

彷彿西溪路，風吹綠玉香。入林深似許，新粉滿衣

想象閒慢學龍眠圖古器吳趨李子工爲記

向爲姜學

在物李子客山有記

前姜後汪相乘除嗜好如以蚓投魚毛

公長歌劇哀麗我欲繼和應嗟歔黃巾蠶起坤靈
覆掠盡昭陽慨陵谷尋常兒女豈能銷合贈輕盈
助朝沐底處重將脂粉調吳王苑內買姪媼只今
細看交枝樣壓倒官哥汝定窯

題汪貞女卷

賢雄未匹鳳先徂侍疾初歸矢莫渝五日爲期同
穴定十年不字畢生孤何妨筭菜稱來婦自信釵
荆勝丈夫佇看旌門輝里巷冬青花影雪紛敷

夏日巨公以白沙泉龍井雨前茶爲貺賦

詩以謝

悠悠林臥晝偏長畏暑都無卻暑方老去參軍多

吻渴竭來禪伯與心涼泉分曉甌和雲送茗裏春
旗待月嘗今日因師聊破戒松風手瀉一甌湯

不飲茶
故云

碧山草堂椽筆歌

古來何人能大書官奴俊爽力有餘淋漓只用埽
泥帚埽出不怕春霑淤化城額傳裴相休以袖搢
墨蛟龍遁何如汪家碧山草堂裏酒酣脫帽看尖
頭睡菴老人氣倜儻青管高提盈一丈至今森然
挂東壁故物不與人俱往藤韜漆護櫻絲牢中山
徒禿千兔毫想見盤旋跳盪發絕叫驚電破硯翻
雲濤長槍大劒莫相笑毛錐如此亦足豪君不見
天竺紅牆似霞起發地扶椽看五字

天竺寺牆觀
自在菩薩五

大字睡
菴書

猶存手澤供摩挲後代良孫解驅使後代

良孫解驅使翻身使臂不使指何當直上天柱峯
千尺一波一磔當空擲山魃木客皆辟易

初秋同旭瞻蒔庭有蘭游西山作四首

坐韜光飛雨軒作

一雨暑解嚴始踐西山約初日翳復吐秋氣滿崑
壑興來歷磧阿蘚磴宛如昨入門翠陰積翻覺涼
雲薄石龍臥空池泉根此焉託坐聽丁東音終古
娛寂寞領珠不自惜天樂然疑作禪老洗聲塵爲
客幽茗瀹

同作

許松

撰杖入淨域塵垢無纖毫竹陰翳殘暑佛香遠
煩囂石龍噴泠泠中畜萬斛濤乍聽疑秋霽久
聆訝春槽邂逅逢勝侶款言興更豪濯纓可終

老媿未解天弢

入龍泓洞中有小穴僧云是昔人采鍾

乳處今不可進

事出劉道真錢唐記

微颺貫崑腹生衣凜不勝短策探龍窟呀然走怪
藤剗中夢天壓捫壁疑雲崩盡處涌佛座指點來
殘僧陰竇不可測鼈行誰復能彷彿千載前言采
鵝管冰度險入九地江底穿幾層櫟聲在頭上隔
石喚欲磨此事道真記祕籍如足憑奇添好事癖
冷結耽詩癥九達彌似隘跬步愁難仍不比游大
滌飛鼠侵明燈

春淙亭遇雨

山行非捷徑因雨亦窘步前峯日尙明飛灑空澗
樹同心二三子復茲不期遇

謂聞石誠叔

橋亭憩華構

目盡崑洞趣苔滴佛螺秋雲歸客衣暮淙潺石上
水導我尋微路

夜宿松靄山房

閑房駛雨過林杪挂星漢涼深欲添衣不但殘暑
追疏盃供細食花巾奉清盥相偕靜者流共待疏
鐘斷夜闌空山黑月吐翠微半澄輝漾庭戶秋影
互凌亂露蟲鳴始急坐覺歲時換人生非學佛詎
免遲暮歎感此不能眠裴回以申旦

秋日同少穆竹田敦復過報國院

釋子禪棲處城隅一徑分風池時動樹秋宇欲銷
雲施食游魚出吟詩野鳥聞何年談小品結社共
諸君

題朱丈鹿田蘇門灌畦圖

人生穹壤閒棲止無定境宦學便擇居何必戀閭
井往者歐陽公終日苦思潁況茲百門泉名與淇
水永太行從東來出沒幾峯嶺清泠滿山腹匯作
跳珠猛分流入綺塍不待汲修綆所以樂土游仲
平有深幸許魯齋詩我來蘇門居遨遊成樂土先生詩家流出守厭
造請三公付孫劉一官罷張邴偶然泉上行光景
愛妍靚遂買泉上田犁評手自秉暇卽挈茗杯樂
在汎舴艋何如西子湖明鏡涵藻荇今年故鄉歸
菟裘嘿焉憬生平釣游侶詎忍棄如梗寄公付佳
兒耆舊得自領畫手想像爲蒼翠善寫影夢繞嘯
臺烟秋燈照耿耿

八月一日讓山上人招集南屏山樓看雨
分韻

俯視僧樓但雲氣滿林飛雨攪秋懷平沈遠岫墨
初潑淨洗明湖鏡乍揩涼向松窗分白衲溼愁蘿
徑阻青鞵黃妃塔畔空濛裏記取炊香共午齋

采菱詞二首

青山影裏遠聞歌
買菱牽絲滿鏡多
儂比菱花偏背日
郎如菱葉慣隨波

鮮於蓮子冷鴻頭
船尾炊來趁晚秋
一百里中香不斷
直從鳳口下湖州

秋陰集汪抱樸城北水房分韻

一片荒雲乍有無
此閒亭館壓菰蒲
淡如人意不可畫
涼到句邊渾欲逋
老柳沿隄烟影重
殘荷覆沼墨痕枯
爲憑橫玉吹教裂
明日西風渡鏡湖

時予

將越游

題北嶺將軍廟二首 并序

廟在蕭山北幹山上按施宿會稽志云武佑廟舊號北嶺將軍廟方臘陷錢唐欲東犯會稽見將軍擐金甲陳兵於西興旗有北嶺字賊不敢渡郡守劉軫上其事賜今額陶宗儀輟耕錄云至正丙申大旱方士陳希微禱雨于北嶺將軍廟俄降筆云吾秦人厲狄也與項羽起事山陰功不竟而死父老不忘我者俾血食於此爾來幾千五百年世代雲變遂湮我姓名故以相告二書所述如此予以乾隆乙丑秋八月同新安吳長公同里丁敬身爲越中之游過謁廟下見壁上有劉伯溫廟記不載神姓名事蹟問之居民俱云厲將軍也陶南村之言似信而有徵作詩以記其實云

北山棟宇自秦餘仗劒英姿尚凜如逐鹿似聞遺
恨事止麟應有補亡書靈旗往往驚樵牧社酒年
年福里閭三戶到頭仍一蹶英雄無命足歎歎
摩挲古碣郁離文未著當年汗馬勲松響忽吹空
際語山光乍卷陣前雲不須白石題神號解使青
溪靖寇氛歸路班荆逢野老至今猶說厲將軍

舟過覺苑寺

在蕭山城中齊江淹宅
捨爲寺門有夢筆橋

越游無他營合志事幽討初程歷蕭然環堞碧秋
草江郎有故居斜日市渠抱維舟試來尋鴉鵲鬧
浩浩牆隅石幢一相對雜傭媪依稀辨垂拱阿武
時所造入門兩甑塔經始已無考猶資象教力鬼
手挂傾倒睿達與溫夫署扁尚完好

敕覺苑寺扁
治平四年沈

遼書三門江寺
扁張卽之書

捫壁讀殘碑元明奚足道獨有夢

筆橋記者吳中老

重建夢筆橋記天聖四年葉清臣撰文最工

似懼地

主嘲其文特摘藻中述會昌年花宮跡如掃僧徒
盡烏巾雁齒廢行潦宣宗卽牽復未琢白石皓茂
宰曰李君成梁十月早我媿詞園荒吉夢敢私禱
華髮謝貂蟬消搖破諸惱幾時買廛居名藍作鄰
保

舟出偏門至禹陵遇雨

出郭逢秋晦菱絲擢幾灣幽雲生窈石靈雨下稽
山屐染重重翠衣霑淺淺斑藏書猶有穴杳靄不
容攀

雨宿臥龍山僧舍分韻

越國此山古聽松占小樓清鐘不散雨破寺共吟
秋漫阻青鞵興如添白髮愁邪溪風日好試上采

菱舟

雨後游戴山戒珠寺遂至怪山寶林寺

越城四面清流涵輕輪小楫如浮驂秋霖乍歇葉
初下發興便欲窮幽探城中八山首采戴君王辛
苦誰能堪橋邊不遇題扇媪右軍彌勒偏同龕棟
撓瓦墮豆房破病僧霜髮垂鬢鬢告訴頻年困水
厄物力詎足營伽藍墨池深黝覆石穴時見鄰叟
汲滿甌逡巡太息下山去龜形岫轉城東南勢若
飛來尙浮動溼雲懵懂縈楮枿登階禮拜彥公像
屋底鰻井深潭潭盤迴折磴苔滑汰絕頂撲眼來
烟嵐濃青冷碧漸褰露什十伍五兼參三餘霞忽
抹天盡處倒射塔杪殷紅酣同游相與話舊事許
掾再世梁王諳太清以後亂旣甚七官兄弟尋戈

鍊岳陽僅存賴黑獺江陵蕞爾古子男稱尊踐阼
崇廟祀蠟鵝稍洗維摩慙居然輟御聞婦臯都講
一現仍優曇前因不昧相輪建波旬劫內願力擔
次律松下發書甕樂全梁上開經函世閒貴仕無
可語吐絲往往纏春蠶淒然歸袂薄寒襲明日更
上林中籃秦稽佳處難悉數安得隨地留茅菴

曉霽入若邪溪中逢暴漲不得至雲門而
返

霽華盪輕舟亂流爭東西千峯碧於洗片月林外
低今朝可憐處真在若邪溪溪光幾曲動沓嶂相
迎送雲散一香爐苔侵三石甕不見浣紗人了非
校書夢宛在畫中行秋高景彌清素湍天際下激
溜筏閒鳴兒童竹裏看知我泝沿情泝沿停兩槳

樵風吹不上崑中子敬宅松下彌陀像落日見歸禽閑心與之往

次日再汎若邪溪至平水肩輿游雲門寺

二首

一作溪中吟再作溪中吟溪中有空翠日日娛人心伊余結勝侶戀賞盈冲襟峯迴近忽遠湍減昨成今雲松窺倒影水竹澄幽陰村市傍渡口炊烟出樹深仙源三十六放翁云自秦望山而北合三十六溪水爲若邪溪迢遞不可尋風鳴灘瀉碧日射潭搖金以茲厲揭意舟師力何任遲回憶昔賢高唱誰嗣音

繫舟在楓根石路穿畦稜秋水溢溝塍瀟瀟入清聽野曠羣峯趨藍烟自包孕遠勢引台明連延接嵒岵秦望獨孤撐香刹倚絕勝多生結淨業來禮

雲門磬辨才殘塔斷思陵鉅蹟
頤松堂寂無人幽
花墜苔徑惟有溪橋風吹我塵夢醒

游蘭亭

蘭渚橋邊爽氣新騎驢石路淨纖塵
青山不改名
常在修竹翻憐迹未陳金谷只愁無好致
選樓何
必識斯人紅牆碧澗瞻
奎畫應覺清秋勝暮春

聖祖亭育御書蘭亭序碑

汎舟鑑湖四首

秋波渺渺碧無泥雲樹參差望不齊
喚得烏篷新
艇子好山都在鑑湖西

放翁宅外賀家莊時有游船繫柳樁
莫學三山但

成隻阿儂最愛住湖雙

湖桑墟一名湖雙以有東南兩鑑湖也

柳姑廟俯蓼花洲獨處無郎俗誤愁
烟縷乍消漁

市散一峯臨鏡學梳頭

柳姑廟向只女像今俗誤偶以男

露冷紅衣已卸香鏡心何處出新妝菱歌未斷西風起八月涼於五月涼

顧丈月田挽詩二首

如此湖山要主盟纔從晚歲識先生爲官落魄人皆笑好客風流世盡傾小別何堪成永訣長留應是有詩名一盃酹向帷堂影傷逝悲秋無限情

幾年吟賞得追陪誰道風霜兩鬢催出郭看花無一老尋山冒雨豈重來室中靈照悲猶小門外羊曇慟不回聞道彌留有佳句可知地下乏仙才

顧丈

歿之前三日尚作秋陰小集詩有句云

菰蒲水氣池塘外只戀君家十畝園

寄和東湖吟社鬪蟋蟀用韓孟鬪雞聯句

韻

陰蟲感殺機居壁久已待爲物雖爭雄於野善潛
彩冷語催緯經天時此其殆早多好勝徒搜括正
壠在尋聲復斂步負鍤似前鋤灌穴晉陽沈跳身
齊國塏羅致殊矜奇籠中各清磊粒飽腰膂強秋
深霜露改分曹小翼輕矯敵前茅雖勇逾螳孤撐
怒比鼃三倍銳氣競磨牙英心甘覆醢敢云飛將
驍漫訝交綏餒窮追始爲懾先鳴特相給罷鬪晷
過申來觀市逢亥黃鬚竟大奇黑衣將焉罪坐令
金注昏笑看駢顏浼或羞見妻孥或喜遷貨賄人
生天壤閒一粟置滄海裸蟲惟此貴力學戒無怠
胡爲昆蟲嬉大事幾敗乃昔聞玉照張亭臺飾金
綵又聞明宣宗奏捷勝歸凱重之足一夔愛如獲
二隗豪家有固然輔導責元宰倡和蟋蟀篇陳義

或可採

原倡

平瀛

張雲錦 鐵珊

秋氣感而生養銳早相待物性本善爭人心藉
得彩燈下鳴偶然牆邊攫殊殆誰信風露中而
有王孫在奮髯堅旣戟鼓翅利於鏃初焉貯冷
盆旋即更爽塏不嫌狀微陋先覺氣礧磊兩雄
忽相遇一戰約難改額廣橫金絲齒緊掀玉曜
搏擊力無餘衝突勢逾倍高足善超距弱肉將
付醢卷甲趨未甘踰垣避先餒種類頗稱繁輕
重詎受給捷如刺傀政神若椎鄙亥將爲知己
死負亦非其罪橫草何人功登臺汗欲浼所嗟
好勝心不惜購重賄游手教搜羅客船到瀕海
四忌犯何曾再角興寧怠殺氣動無端機心暗

啓乃旌之以三花雜之以五綵同類反見戕作
歌奚獻凱仰關罷攻秦九泥類封隗孕此屬多
事吾欲問真宰盧賦與賈經雖存詎足採

同作

平潮

鮑

詢咸吉

促織性喜爭紛紛設壇待石產質孕剛葦化色
流彩練牙與卷鬚一犯防三殆

語見促織經

呼燈敢

厭窺聞聲早識在鳴寒股撻金迎陽甲張鐃托
跡近疎籬選地得幽塏灌以水泠泠搜從石磊
磊牙籠舊式藏瓦盆新樣改異種赤疑斑凡品
白遜曜冷煖分後先優劣判億倍同類如仇讎
甘心相菹醢置偶使不孤善養期無餒形含詎
嫌微色辨莫教給計功正當秋爲月恐近亥想
彼鬥方酣奚啻聲其罪髯奮勢孤撐目注汗流

浼挑戰憑寸草尅期博重賄兩軍勁成敵百夫
喧沸海俄焉雌雄分負者神色怠童心殊懵然
公事竟敗乃奔逐空攢花奢侈到翦綵壯矣將
留名歸歟捷報凱託命於斯蟲如昭之尊隗長
安市上豪半閑堂中宰一例等兒嬉齷齪甯足
採

同作

平湖

陸銘一 紆齋

萬物以類親茲獨鬪相待秉性殊貪殘振羽偏
光彩雌伏肯自甘妒生那識殆疎燈照何頻冷
盆看早在偶居調絲琴獨處斂矛鏃帥陰蓄之
幽迎陽更諸塏高臺瞻巍巍廣場爭磊磊輕重
等使齊暄寒候無改挑以庭草青辨從窗紙催
始角氣無前中休勇益倍急擊朝始食久持夕

欲醢聲從百夫喧色令一時餒鹽腦伏且柔傷
股遁以給奮如再戰陵突似重圍亥或勝而或
負奚功又奚罪局內智多昏旁觀指恆浼來笑
賈客名遠客泊舟來去飽胥吏賄怒臂螳當車
癡心鳥填海牀空資無留秋老興不怠在物已
蠢然一作於人復誤乃徒教箱餞金浪使竿簇
綵逐逐敢憚勞雍雍虛唱凱策勳不殊韓酬知
信如隗戲不止狡童禁還仗賢宰良士樂無荒
旨哉言足採

九月晦日許繩武招集雪莊二首

巾子峯前好卜居無多樹石小林廬若添畫舫兼

歌板快雪名堂定不如

快雪堂明馮祭酒開之湖上別業也

九月十月接天氣裏湖外湖空水烟門外晚風吹

酒醒秋容都上釣魚船

立冬日陸雲軒招集南屏讓公房看紅葉

分韻

閑隨漁艇泊烟汀絳葉招人此再經十日晴光連
樹醉數峯寒影上樓青雁來已是新霜後僧定還
同夜雨聽最好湖心放歸櫂斜陽有意畫南屏

冬夜泊八赤懷施自勗

一番新寒客路中墨雲零落水天空故人將近似
江月小艇獨眠多野風五畝未蒙行役力半生微
有著書功明朝相見姑胥郭歲晚心期訝許同

小玲瓏山館對雪聯句

子月尙暄和

陳章

丙夜忽淒斂初爲雨脚凍

端

突作

風色慙寒析聲漸沈

姚世

荒燈燄頻颭撒沙響虛

牖

張增

積素耀危檻被池生廉隅

章

枕角冷圭琰曙

早起猶怯

鶻

氣嚴出未敢庭空亂回旋

世鈺

石怪競

霜點緣隙胃若塵

增

堆檐覆成广禽飢觜難啄

章

兒戲手頻擊眯目疑復墮

鶻

失足防入坎毀茶多

嬾埽

世鈺

惜竹重宜撼飄瞥竟聯聯

增

紛糅方冉冉

有客船阻歸

章

相與祛再摻遙思大江白

鶻

但見

同雲黯交飛射驚鷁

世鈺

急陣灑葭莢玉峯迴可畫

增

銀浪疊誰犯匿影閉閑齋

章

促膝探秘檢宛然

鶴延望

鶻

儼爾魚聚摻得酒歡喜生

世鈺

開爐噤瘁

減地主獨能賢

增

羈人自多感短景憐崢嶸

章

長

年抱頷顙斲冰待過淞

鶻

鼓枻擬入剡何當問郵

籤

世鈺

陽烏放朝暉

增

看山樓雪月聯句

雪初晴月復清

鶚

氣曩眞光晶瑩

章

登層樓暢幽

情

世

炙冰硯溫酒鐙

馬

澄萬象增雙明

馬

廣

寒府白玉京

鶚

竹聲瀉松影橫

章

籟旣寂思已盈

鉦

世

翦殘燭戀深更

日

歲云晏志合併

日

略

行菴雅集分詠寒事得宋子京修唐書

昔賢擅文章頗亦事豪縱太守書局隨風流只小
宋雪深椽燭燒起草蛾眉從主人如此稀不作舞
腰供液金黛墨語奇麗有時用區區王攄南輕議
若聚訟

雪後同金江聲過直指菴尋韓平原閱古

泉遺跡

委巷不知山倚山構蓮宇尋幽繙舊史定是韓王
府佛閣踞池上寒藻搖翠縷有如半破月崑畔一

泓吐桃坡繚其巔歲久疑鬼斧當時勞人工用以

貯歌舞四朝聞見錄載閣古堂有桃坡十二級今山上遺跡尚存折鼎尚包羞

覆車孰禦侮文章累詞人陸放翁作姚冶惑遠祖閣古堂記

予家族譜載明州御幹子飛公家饒于財號屬半州娶韓平原三夫人號滿頭花者為後妻遂以不

振同來近殘臘誰作雲岫主融雪添波痕半瓢為

酌取詎聞丞相嗔荒涼真閱古

除夕同江聲壽門堇浦甌亭諸君登吳山

飲酒樓分韻

危闌徙倚靜無譁共惜流年赴壑蛇山轉晴光餘

半壁渠添雪水貫千家牽連酒伴生吟思棖觸風

情上鬢華只有故園今夕好翩翩目極後棲鴉

正月三日同敦復旭瞻汎湖至聖因寺訪

恒公不值丙寅

開歲無事相與娛尋僧幸有三人俱笑披風帽上
野艇靜聽柔櫓衝烟湖經聲出院自斷續山影隔
林時有無筇枝定入天竺去想見礪鶴同清癯

送桑弢甫獨爲天台雁蕩之游

桑君江海人意氣頗超忽早摘銀案髭歸來臥松
月開年雪載塗山情生勃勃蠟屐告我行健似橫
空鷗前身打包僧游跡記髣髴自言昏嫁了詎使
塵土汨先爲豐十訪次作矩羅謁攜影當朋儔扶
杖卽隸卒拜號獨往生斯語庶非伐獨汎單鷗隨
獨憩孤樹歇獨宿寒凌兢獨行翠窳窳獨吟崑崙
響獨沐風晞髮獨眺俯鶴巢獨飲侵龍窟天台峙
東南奇秀甲於越客兒失雁蕩晚出名馳突我有
中宵夢往往淩崕屺輸君濟勝具先我結雙轡事

不婦子謀興爲嵐霞發埃君銜袖詩千載期毋沒
立春日雨中趙誠夫松江歸過訪

市橋昨夜駐吟篷春入幽人杖履中白髮增年非
我獨閑園聽雨喜君同詩編歇浦經時客燈憶沙
河舊日風剩有南華梅信近借書貰酒鎮過從

君家
堂名

同竹田大恒讓山二上人由九里松入西
山坐冷泉亭作

久隔山中游妙友欣所從行行背湖色采入春烟
重方袍二釋子邂逅道氣濃平橋得小憩目盡西
南峯秀色紛然來相與媚雲松中有不朽語挹之
復無蹤

賈長江詩人
有春不

語得之烟山

春不

透迤歷翠壑晴多斷幽

淙亭影漾清泚寒碧鑑心胷疎梅爲我花芳草正

丰茸徘徊拍闌干喚起澗底龍

白雲山房看梅

不知花好處直作白雲看磬在香中度山從枝上
寒主人來亦少客子到應難只爲題詩計東風莫
易殘

花朝河干草堂小集分韻

中春花信冷難齊吟客須教取次題故國雲山遲
社燕草堂風雨誤朝雞河邊吹水添杯滿樓上凭
闌放艇低頭白周郎苦相憶避人今夜宿湖西時少
穆以七十生日
避跡湖上不至

雨中許蒔庭春崑招同誠夫笠人汎舟北
郭看花二首

試問花餘幾舟游貴及時風輕搖燕尾雨細溼鵝

兒紅素霏霏暗林垆漠漠吹一峯青乍破乞取晚晴宜

村轉疑無路平生數問津花閒上塘水雲裏臯亭神俗古知栽植人閑卽隱淪多君好兄弟刻意此憐春

王象之輿地碑目杭州有牛僧孺臯亭神祠記

同作

汪還仁

臯亭春事勝酒舫閱游棕花渚隨風轉雲山帶雨濃魚爭落英去人向暮烟逢何必仙源裏纔稱物外蹤

同作

許松

緬想桃源境臯亭彷彿同招朋尋曲渚蕩槳入芳叢雨過山如黛花多水盡紅迷津何處問雞唱綠蘿中

閏三月三日同人集湖上續修禊效蘭亭

詩體二首

平湖重陰烟水相借眷茲餘月錢春迎夏溯沿勝
事莫不代謝凡我苔岑讌娛清暇

羣公悅衿契布席臨芳流夜雨被衆綠雲與山沈
浮重三復重月一唱還一酬漫言繼蘭渚興到非
外求

初夏汎舟至孤山

弄晴小雨落餘飛水外西峯未夕暉滿地綠陰春
去後幽禽猶道不如歸

晚出東新關同堇浦甌亭作

背郭乍過雨晚涼衣上侵聊爲汀畔飯共作烟中
吟燈影橫橋柵人聲出樹陰相攜多舊侶幽賞得

初心

題清溪寓樓

四月臨溪水清流直貫城千家翠綃舞列岫黛眉
橫日落收漁市宵分過櫓聲樓高聞白苧何事不
勝情

謁餘不亭侯廟辭

餘不水兮粼粼涵芳蒨兮白蘋侯之封兮水濱廟
食此兮爲明神龜左顧兮何之繫侯德兮民思民
思兮寓象車兩轡兮船兩旗侯山下兮欲旋風出
廟兮泠然巫歌兮雩舞隨侯來兮靈雨

游慈相寺半月泉

秀岑敷青蓮鬱然抱精廬出郭路匪遙短策破睡
餘僧廚已過午寂寥冷鐘魚蒼髯韻天風渺若太

古初亭空試一窺
泉影蝕蟾蜍掬之冷沁齒碧華
溢方諸暎地佇開明在山妙涵虛
緬彼南澗翁早負冰清譽
館甥得東萊於此讀羣書
飲水尋孔顏真樂恒晏如
古人不可見落日歸鳥疎

登吳羌山謁織簾先生祠

言尋吳羌山孤峯拔雲起
齊書名吳差定復傳譌
耳井邑俯鱗鱗石路躡齒齒
下有織簾居清風被
閭里先生值衰季攘敝中所鄙
老惟守遺經歿但
酸寒水荒祠傍社公惜哉塵滿几
茂宰初下車行
將樹逸軌謂施明府築堂增高明
懷賢式浮靡我爲歌
神弦再拜執筆埃

自乾元寺至金蓮磧

茗亭望南山窈窕穿翠麓
洗心有風潭空影覆羣

木年深寺亦殘飛鼠棲佛屋誰彈幽磬泉泠泠聲
滿谷

施壁齋明府招集德清縣齋

寂寂重門掩幽禽見出迎蠶忙少公事吏散得吟
情烟樹搖書碧溪風入酒清猶思臨宛水釣艇夕
陽明

曉行臯亭道中

牽埭披衣有底忙水烟籠日共蒼涼客行十里又
五里舟過下塘還上塘驅犢岸高青嶂近護蠶門
靜綠陰長平生未了山游債處處唯聞佛土香

亡友吳繡公墓下作

赤岸停孤艇青山對殯宮平生腹痛語今日淚痕
中子守書無失謂顯亭人嗟命不融凌雲埋可得地

下傲三公

坐安隱寺泉上

亭亭石蓮幢千載標覺路秧田鋪僧衣松蓋引客
步寺門幽且深泓泉蓄復注林光射池影下見金
碧聚疑有神物潛山鳥不敢汙我來鬪茶坐蠲熱
欣所遇想見六月中行人屢回顧

留題廣嚴寺次鮮于伯機韻

臨平山畔訪仁祠我亦經過首夏時林下追從惟
野衲門前來往但舟師護伽藍失河南象伯機又有絕句
云褚河南是護伽藍窅堵波空元覽碑唐元覽法師碑已不存祇有僧
房青竹好寥寥懷古一題詩

景星觀尋唐正員外丹故居

并序

予嘗讀韋蘇州正員外丹還臨平山居詩又觀咸

淳臨安志知員外仙去至今山有黃犢嶺以嘗騎
黃犢得名有曲竹爲員外遺杖所化又考陳郁話
腴云行都城北五十四里臨平湖岸有山山有景
星觀觀有正真人祠祠有丹爐正本唐人仕嘗爲
郎棄官學道於此飛昇顧況訪之詩云五月五日
日亭午獨自騎驢入山塢來到君家不見君下驢
倚杖叩君戶驚起山童開竹扉黃犬搖尾銜人衣
試問先生往何處云入山中采紫薇平明一去今
未歸引我池中看釣磯池中數箇白鷗兒見人慣
後癡不飛待君歸來君未歸卻復騎驢下翠微此
詩況集不載久思訪其遺跡今年四月三日因安
隱僧心月之導始得至所謂景星觀者殿祠東岳
仁聖帝像前有杉柏二株奇古近千年物問丹爐

及真人祠所在道士懵然不知獨門外有池水色
渟碧上架小石橋疑卽況詩池中看釣磯處也裴
回太息爲長詩以紀事庶幾有復其祠者

詩人成仙古寥寥正員外今不可招斜陽照影入
深塢參差碧殿凌霄殿前何有有杉柏千年誰
見蒼顏凋我疑勁直經手種偶逃劫火遺山樵丹
井填湮丹竈廢光景無復浮雲歔黃冠揖客老且
眊問之不辨空頭搖只崇岱帝懾愚俗鬼炊虎獄
何紛囂裴回門外覓行跡紫屏風動空池漂鷗兒
飛去不知處逋翁當日過此橋高詞貞行已足祀
遐舉況是隨烟飄

韋蘇州贈正丹詩高詞
棄浮靡貞行表鄉閭

何人好

事塑遺像酌以明水歌雲謠歸來故鄉莫惆悵自
跨黃犢凌單椒山中秋冷桂花發往往弄月仍吹

簫

游明因尼寺

阿姨師居近鼎湖
剎造傳自陳黃奴
向聞賜金出宮掖
千年興廢誰枝梧
顏垣古殿尙宏敞
暗竄分流水聲響
幽花閒竹隱禪房
忍草沿階叩方丈
前朝淨侶多上流
早脫愛網辭妝樓
明眸不教二相墮
幻質能將八敬修
百年主席凡幾輩
老宿無存少酬對
誰人肯透末山機
何處重尋隱峯妹
今來儉薄檀施衰
粥魚寥落誦經遲
笑他洛陽急作髻
不見文殊淺畫眉
殘碑字剝苔痕綠
寺有明天順年中胡濛碑
對此彌傷人代速
枝頭批頰盡情啼
聲聲似奏無生曲

題驃騎將軍廟

祀楚申公包胥
封號莫詳所自

楚事蒼茫直至今何年此地出神林
吳志員在難酬入郢心古屋香雲晴
馬畫悒悒賜幡綠錦休重問木彪山
夔不敢侵元俞

琰題廟詩呼童出示綠
錦幡云是前朝敕賜物

雨泊桐扣二首

晚際開襟共看泉山頭雲起野風顛
白龍潭上飛來雨引我菰蒲夜泊船
三更雨歇冷于秋翦燭題詩劇未休
四面亂蛙聲裏坐不知元在古杭州

樊榭山房續集卷五

YORK UNIVERSITY

MAY 15 2001

EAST ASIAN STUDIES

